


文

恭

集

四







文 恭 集

(四)

胡 宿 撰

# 文恭集卷十八

## 外制

張昇可兵部員外郎充天章閣待制環慶路都部署經略安撫等使兼知慶州制

敕朕選通經術有行義之士訪對制閣參典祕圖置在內朝之聯本惟儒者之職間咨策略分寄翰垣亦服采于禁嚴且推恩于臨遣我收文武之用往制羌胡之衝乃獲能臣爰敷茂典具官某有史魚之直稱壺遂之賢稔聞忠規嘗置罔錯端心向國處鯁議而弗回正色立朝臨至剛而不吐屬西川之闕帥惟安化之控邊言念戎翰之良無踰書殿之舊進參持橐寵升屬車臨長列藩表率本道噫左右薦替內外屏毗委仗則均安集攸賴書不云乎爾身在外乃心罔不在王室寬我西顧勉而求忠

劉沆可依前給事中充龍圖閣學士知開封府制

敕前世尹正之才難于三輔本朝都府之政刑諸四方我得吏師寄之京劇宜峻圖書之職往裁輦轂之煩具官某風業俊雄體識明遠早代言于掖省常賦政于藩方文采潤色而有餘經術飾事而不感委靈刑之審克多中典之平反咨乃讞疑副予欽恤試公才之敏百鍊不銷考績用之期一閏已效瞻惟浩穰



之地實資強濟之能。剖析煩拏。推行靡密。自近庭而還衆。繇內閣以升名。往司獄市之繁。善體教條之意。使枉直有寄。苛慝不興。嘉竚治功。以光表則。

錢明逸可依前兵部員外郎充龍圖閣學士知蔡州制

敕京輦之政。誠處劇煩。狂獄之情。所當審克。既失防閑之理。宜從罷免之科。具官某。雅稱偉才。早奉大對。入典明命。作爲訓辭。擢預禁林之游。委司都府之治。失于馭吏。淹乃繫囚。久違弊斷之期。不勝楚掠之苦。以至踣斃。良用哀恫。而又日者庸狡之人。構造詐諉之策。冀望非福。震驚朕師。雖已正于刑書。猶未安于朝議。其上尹政。且領守符。仍優內閣之除。兼委近藩之便。尙圖敏政。勿替來忠。

劉沆可龍圖閣學士給事中知永興府制

敕朕以內閣圖書之職。資儒術行業。充備其選。全雍戎馬之地。用文武器幹。倚以爲重。既獲敷求之志。宜有臨遣之恩。姑示瞻懷。且旌圖任。以爾具官某。才具明決。知識周通。自振藻于皇塗。實有聲于當世。作我明命。著訓暢于西臺。敷厥教條。勤撫綏于南夏。能去山林之藁。善得江漢之心。比奉更書。還參從躡。委近司之審克。多中典之平反。刑讞靡留。朝言惟穩。會長安之闕帥。方四顧以須才。僉曰汝賢。協于朕意。左右獻納。雖志力之是圖。內外屏毗。在藩朝之均重。爰申茂典。益進榮名。用煩俊哲之行。參付德刑之計。噫。重兵所部。難谷攸居。雖方略素明。無煩于多訓。而剛柔參濟。勉務于適中。往服茲猷。勉成遠用。

左中奉大夫權尙書吏部侍郎兼史館修撰周綰除集英殿修撰知温州制

敕近臣勇退。游控于忱言。王者閱勞。俯從于雅志。睠惟耆艾。宜錫恩輝。具官某。學術醇深。行能高妙。登車攬轡。徧更外服之華。拖玉飛綏。晚上禁塗之峻。銓綜著天官之效。編摩光金匱之藏。方隆尙齒之時。遽有由衷之請。老臣是賴。申諭莫回。升麗正之崇資。畀永嘉之名郡。以優耆德。以示殊私。尙勉建于風聲。卽還躋于次對。

右侍禁折繼祖可西染院使知福州制

敕具官某。爾世蹈忠圖。族雄邊部。率種落。懷附朝家。嚮茲伯氏之良。承濟前人之業。遏磧中之外警。委河上之列城。方倚拊循。遽嗟殞缺。覽疆臣之條奏。逮部衆之控祈。謂爾武幹尤長。純誠可任。習知戎馬之事。能識羌夷之情。宜襲奮勳。式俞來請。伸部符之朝獎。遂染翟之使聯。恩典有崇。名秩其慎。當善遇于吾衆。務謹守于先規。

李昭述可依前刑部侍郎充龍圖閣學士秦鳳路馬步軍副都部署兼知秦州制

敕二閣峙于內。職在圖書。六郡被于邊。任居戎馬。矧隴西之尙武。惟天水之稱雄。謀諸師臣。得于雋望。適倚鎮綏之略。宜推臨遣之恩。具官某。盛德名門。偉才良器。該典文而多洽。資志識而周通。居然敏猷。應乃郡務。幾廷進直。得安世慎密之風。北道倚臨。有翁歸文武之用。塞垣以肅。年閏比更。試乃秦中。濱茲河外。撫羌戎之雜種。制汧隴之勁兵。牧人其難。選衆斯屬。用寬西顧之睠。具急盛秋之防。兼疇制閩之勤庸。益進祕圖之禁職。憑賴所寄。內外則均。勉從易壤之行。嘉佇幹方之最。其聽朕命。不忘爾勞。

劉巽可主客員外郎知濟州仍賜紫制

敕某。究明經義。初預銓集之流。通曉吏文。遂膺宰旅之選。領校五曹之事。慎持三省之方。能寡悔尤。頗精比例。寢升朝次。屢易歲陰。用圖風力之勞。出寄符書之守。仍進握蘭之秩。復班染蒨之章。臨長吏民。宣錄條教。勉而善政。虔我渥恩。

李珣可文州刺史制

敕。朕考經術之文。見春秋之法。推親親以貴母黨。因善善而及宗支。況我外親。殞夫元舅。痛享年之不永。撫遺札以增歎。俾加惠于孤煢。示敦仁于戚屬。具官某。柔恭克存。通敏且材。侍子舍而無違。出后家而有裕。早任天闕之要。誠爲戚畹之良。險釁所鍾。哀摧在疚。尋推恩之有自。在進秩以攸宜。已陞右閣之華。兼刺列城之重。慰其孝嗣。思乃前人。式究哀榮。勉思法訓。

趙良弼自豐州刺史除撫州刺史制

敕。師賓之列。素用正人。牧守之任。必求良吏。具官某。資于忠信。文之禮樂。言詞詳雅。器識洪通。令問徽猷。摺紳推重。南宮起草。事著于彌綸。東吳授鉞。功存于制勝。中外之政。終始不渝。爰自休閒。尤彰操尚。宮垣選美。俾參調護之職。方鎮藉能。式委分憂之寄。

劉永年可寧州刺史制

敕某。夫刺史。古之方伯。爲國爪牙。任千里之尊。秉一州之率。威懷所寄。擢敍尤艱。以爾冑緒。本華才資。兼

茂。謹乎匪懈。敏濟有聞。歷內庭諸使之聯。申列部鈐兵之委。載環歲序。參敍宿勤。特升刺部之名。尙寄典士之任。廩給優厚。朝渥便蕃。勿忘俯偃之恭。更圖臨履之效。

### 張惟吉可果州刺史制

敕。謹質者。朕所倚愛。澹退者。人之難能。況夫參珥左璫。列侍中省。久居親信之任。弗矜委使之勞。宜舉褒章。且旌冲範。具官某。忠純有守。謙約自持。侍帷幄之起居。常勤陟恪。慎樞機之周密。能絕悔尤。比資強敏之材。屢任劇繁之職。會驅馳之不憚。在俯偃而益恭。未嘗求官。且不遺力。安和備于諸事。恬晦簡于朕心。是用申敍積勩。褒遷茂秩。領劇部團兵之重。增昆臺近侍之榮。名數有加。寵靈特出。勿替謹孚之志。益昭毗倚之懷。

### 郭元乂可忠州刺史陳拱可昌州刺史制

敕某等。內統禁局。參領列籓。所以昭使範之華。重戎翰之寄。用甄勞最。式示褒遷。以爾元乂。材武是經。智謀在任。以爾拱。迪知忠果。服在勇方。竝高諸使之聯。分委護兵之任。絕甘有素。馭衆適宜。代北以清。嶠南且肅。嘉訓齊之輯睦。遠控遏之底寧。并升使竹之名。參壯和門之重。就虔褒典。勿替忠圖。

### 刑王孫宗望可遙郡刺史制

敕某。朕篤在展親。樂聞爲善。用進州藩之秩。且旌宗邸之能。恩出褒優。義存開勸。以爾本支秀發。環衛參居。滋承信厚之風。雅厭紛華之習。慕前良之楷法。試累牘之柔毫。獻狀公車。留觀天帳。迴臻體骨之媚。深



嘉芝墨之工。特升刺部之名。用獎臨池之學。勿忘美志。更懋令猷。

張中庸可開封府判官制

敕某。漢制以御史監三輔。不法。復有按章覆問之選。至于惠文柱下。皆獄法之冠也。不止于彈治而已。今都畿尹政之劇。獄市。姦人之淵。隱僞干憲。屬之良吏。以爾治劇有餘。審固不撓。資其抑欲之利。與夫照姦之明。往裁諸煩。善輔于尹。

劉能可御前忠佐馬步軍副都領依前合州刺史制

敕某。勾陳之衛。參護宸嚴。尺一之遷。舉循功次。以爾奮繇行伍。通知勇方。頗積勤庸。遂有高爵。遙刺州部。近拱巖除。宜升環列之名。益佇樸忠之效。勿忘勵節。以答推恩。

譚嘉震可依舊內園使昭州刺史制

敕。內司苑監。遙制蕃職。所以壯爪牙之選。重襟喉之寄。矧幹方之惟舊。且扞邊之有勞。屬申委于兵鈴。宜兼榮于使竹。具官某。本惟將種。少有驍名。好慷慨以論兵。加深沈而多算。洊領偏裨之任。數當外禦之鋒。疆堠無侵軼之虞。軍行有輯睦之整。乃陞安化。適控西戎。尤急盛秋之防。特倚勁兵之處。寵升刺部。雄示專城。勉踵世勳。益圖軍最。

王興可陵州團練使傅永吉可開州刺史孟元可普州刺史蔣偕可忠州刺史制

敕某等。夫舉不失功。則勞臣知勸。賞不遺外。則主恩下究。朕閱邊吏之瑣。因見疆臣之名。其間久踐戎行。

屢當寇禦。功名著而甚白。爵秩鬱而未遷。用振滯淹。特申甄拔。以爾興資。韞材武濟。以樸忠。以爾永吉。嘗摧姦鋒。名有勇決。以爾元氣。質沈毅。部分精明。以爾偕文武。自將功名。已任竝曉。知疆事。而達練戎韜。勳賴扞城之雄。比居控塞之任。種落畏伏。亭障底寧。今參委戎鈐。復分制藩任。軍陣輯睦。士伍綏懷。藉用舊勞。申加褒典。進領團兵之重。參升刺部之名。出于朕心。旌爾邊最。各思自效。勿替曩圖。

### 石全彬可陵州團練使制

敕某。朕寵厚武材。竝建使範。乃眷軍團之峻。尤爲戎翰之榮。方寄外虞。式頒成渥。以爾操修無缺。幹裕有聞。以謹孚之資。早服勞于官省。以敏洽之用。久宣力于邊關。眷雍部之控戎。惟匈奴之被塞。允號勁兵之處。尤艱禦衆之材。資乃練更。委之鈐護。仍進訓齊之秩。用旌臨履之勞。往服茂恩。善撫吾衆。

### 劉永世可果州刺史充本州團練使制

敕。朕慎名器之分。懋官賞之宜。差次功能。擢敘武爵。旣篤先勞之勸。兼圖久次之勤。用遷滯留。宜伸甄拔。以爾承胄緒之舊。資性質之良。遙分竹使之符。近總琳房之職。習事經而無缺。奉朝請而有虔。閱官簿而則深。覽需章而乃實。爰紀恪恭之節。用升團練之名。尙洩威神之庭。往欽使部之寵。益思慎履。當體殊恩。王從善可西京左藏庫使依前充果州團練使制

敕某。洛師之重。分置于官儀。禁帑之名。差優于使範。用甄往效。特懋茲恩。以爾勳閱緒餘。近庭陟恪。蹈世忠而濟美。服王務以宣勞。勳者資。素性之謹良。委禁垣之提警。雖宿衛無狀。俾出領于兵鈐。而曠昔有勞。

用稍遷于使局。示舊勤之匪棄。尙褒典之是承。

余靖可左神武大將軍。遙郡刺史。州鈐轄。差遣制。

敕某。陟罰之典。竝體于至公。甄敘之恩。用圖于曩效。張敞起于亡命。安國擢于徒中。資以前勤。抑惟往制。以爾博于古學。濟以敏文。自致秀科。優入制等。常游册府之祕。適升辭禁之華。煩使有材。首公能力。曩因往咎。中見謫居。越在南服之荒。多歷徂年之所。尙分留籍。已進亞卿。朕以爾久侍近班。三使絕域。念勞可錄。在宥弗忘。擢居環衛之嚴。遙刺列城之重。無以名器之小異。當問才略之何如。起圖而忠。往服朕命。就司鈐護。當體敘收。

李瑋可起復雲麾將軍保州團練使制

敕朕感先慈。早棄長世。眷乃元舅。適及外家。享命弗融。遺恩宜厚。具官某。義方被敎。退讓陶風。稟詔令以兼資。處紛華而匪雜。曩膺選尙。方俾進修。屬遭親喪。例推權制。用正軍團之秩。兼升環衛之名。式慰孝思。俾參朝請。庶幾進見。特示眷懷。勉遵肯構之規。宜亮奪哀之意。

溪洞新州知州彭師政富州知州彭師晡竝可銀酒監武知本州軍州事制

敕某等。越在辰溪。欽我朝化。善固封守。多歷歲年。有嘉成勞。且敘前化。崇階美秩。勳等憲聯。竝命詔除。益圖忠效。

溪洞寧州知州彭師鴈可銀酒監武知寧州制

敕某能慕聲明善固封守附陳前比求敍上恩嘉其輸附之誠伸以褒優之命崇階茂秩華紱命章併示寵綬益圖欣載

曹正可袁州司馬制

敕某爾幹局無缺第課當遷具有奏封乞從歸老聽解算商之任爲除司武之名往服優恩俾從素志

追官勒停人屯田員外郎蕭禮可萊州別駕制

敕某籍通省郎班在朝序簡書罔畏簠簋不修詐諛受賂鞠問得狀所坐狼籍談者誼譁宜正刑書奪去官秩與之上介猶曰寬恩

解賓王可開封府判官闈詢可開封府推官制

敕某等古者京兆比三輔爲劇今之都府亦萬事所叢必簡乃僚協相厥務以爾賓王儒者之風志行修潔臺觀討論之職京輦煩拏之任稽諸行事已試之效孔明以爾詢髦士之良才本強濟緣中司薄罪之坐歷外屏左官之遷長于治民可紀之績甚白或就甄最狀升冠元僚或還錄敏資佐治煩局噫郵罰麗于事察獄必以情勉思是言勿懈于位

高良夫可依前主客員外郎充開封府判官石揚休可太常博士兼祕閣校理充開封府推官制  
敕某等朕高選時望擢典京司妙簡才髦參備僚屬以爾良夫習于爲吏治有能名以爾揚休才堪決煩文甚爾雅或嘗操外憲之柄或久預中祕之游稽慰薦而有先試浩繁而已效是宜參濟京劇輔佐尹賢



爾其察人冤謹吏黠慎要囚之伏念體庶獄之哀矜務竭乃心以稱朕意

范純熙可鄧州節度推官制

敕某習知吏事領佩縣章本于惠心善撫黔細沛有餘力能制寇偷支黨悉除鄉亭絕警州上勞迹臺舉賞科擢亞元僚之游且旌健令之最

凌起可昭化軍節度推官制

敕某本造士之良膺字人之寄越在嶺服肅治邑封尤旌方略之施多有寇攘之獲閱計臺之言狀覆憲部而中科擢參賓謀申示朝賞

解賓王可開封府推官制

敕某中畿尹政之繁總司都輔先朝景德之制增至屬僚參聽庶獄之辭分裁一府之任用釐浩劇必選幹能以爾學力淹通性資純固預儒館討論之任更曲臺贊相之儀用先行實之圖且膺政務之試強敏者乃其有濟安舒者戒于後時往承上官勉修爾職

鄧唐可懷州防禦推官張式可賓州軍事推官制

敕某等往者職在詰盜資入督郵能修尉察之方善厲追胥之力寇偷就獲墟落底寧覽嘉勤吏之能超用有司之格擢從州簿參預賓籌往祗從事之榮勿替首公之敏

許震可試大理評事充威武軍節度推官制

敕具官某循吏之子清白承遺緣蔭格而隨牒階詔舉以字民所守廉平素行修整代還有應書之最次補以入幕之僚尙寄弦歌勉績功次滿課之上則有前詔

張伯通可試大理評事充奉寧軍節度推官制

敕具官某朕用天聖詔書選舉令宰賞格條目端委詳陳所以爲官擇人廣施德于天下比聞撫字多獲善良齋伐之來恩典奚吝爾以蔭籍階仕版以薦任佩縣章滿秩有功在法當陟宜參入幕之畫尙寄鳴弦之治往欽無忽汔濟有成尙佇來勤乃終後慶

李益可試大理評事充徐州觀察推官制

敕具官某任居宰字介在邊隅歲惡無聊民起爲盜能施設于方略悉擒送于根株縣部底寧臺格應賞乃矚彭門之劇俾參幕府之籌用錄前勤尙圖來效

劉義叟可試祕校呂夏卿可試祕校充石州軍事推官餘如故制

敕某等奮自髦彥名有學術義叟早膺詔舉獻策開邊夏卿擢自賓興以文入轂或試員于列寺或隨牒于遠方會置局以修書俾和鉛而參職觀所舉者咸吾近臣稔聞約史之勞加有奉祠之恪熙成均慶典頌爲言用升賓幕之資對服書筵之舊姑爲漸陸勉濟成編

張子庚可殿中丞依舊知縣制

敕具官某夫春秋之法先內而後外繇近以及遠爾早籍穀中之雋適治寰內之邑持身近厚從政弗苛

條上年庸協應賞格。進丞盾省之局。參預朝著之聯。于以風激四方。開勸勳吏。此亦先京師。後諸夏之義也。其襟承之哉。

劉槩可試大理評事充忠武將軍節度推官知邢州堯山縣制

敕具官某。爾擢奉臺詔。治茲邑氓。能體勤約之風。善賦惠和之政。終更無缺。旌陟有條。宜升幕府之游。尙寄縣同之任。勉修前績。姑俟後恩。

前守鄜州洛川縣令宋太可試大理評事充天平軍節度推官知潞州壺關縣事制

敕某。以敏給之才。推擇爲令。在職稱辦。于法當遷。列于賓席之聯。付以縣章之寄。益圖善治。以漸榮階。

張徽可試大理評事充節度推官知夔州奉節縣制

敕具官某。以軍從事之職。任邑大夫之政。秩滿官下。代還邊隅。較課中銓。升榮大幕。尙寄弦歌之治。勿忘簠簋之修。有佇來勤。以須後陟。

高汝士可山南西道節度推官知瀘川縣韓澤可山南東道節度推官知廣安軍新明縣制

敕某等。縣大夫之職。去民最親。朕用天聖詔書。拔舉清吏。付以銅墨。寄以弦歌。似聞元元。頗受其賜。脫有異績。何愛陟恩。爾等名在選中。治成官下。終更齋伐。鈞校應書。稍升幕府之游。重煩美錦之製。勉卒前課。具如賞條。

郭旦可依前祕校知單州成武縣公遜迪可試祕校知齊州歷城縣馬居方可試祕校知濮州臨

濮縣制

敕某等、邑大夫之任。以寄赤子之命。非有臨履善最。監司薦延。朕未嘗輕授銅墨。爾等居尉察之職。有追胥之勞。剪除盜姦。肅清鄉部。本郡言狀。有司覆實。在勤可紀。于法得遷。竝試守一同。臨長百里。有民有社。良足爲政。既能屏去苛慝。便當存撫細弱。脫有善迹。何愛存官。往正爾心。使稱朕意。

李舉賢可洛州曲周縣令制

敕某、以法學之明。靡我爵秩。以吏資之習。服我尉員。方略甚明。寇攘多獲。有司言狀。賞格應遷。嘉其敏才。擢以健令。勉樹庇民之績。且旌詰盜之能。

呂用賢可磁州邯鄲縣令制

敕某、勾稽名官。承乏比邑。檢簿書之謬。絕有毫差。督寇偷之姦。悉能株送。卿亭肅乂。民堵安安。所部條聞。厥勞炳著。宜示賞科之信。俾要健令之章。往服褒遷。益圖員補。

成吉甫可趙州隆平縣令制

敕某、中經生之科。隨大選之牒。守尉百里。詰盜四封。盡得主名。多獲支黨。留司上其最狀。憲部議其賞條。宜升佩于縣章。用勸登于吏力。就虔褻寵。勉務清修。

申陟可相州湯陰縣令李伾可兗州瑕丘縣令制

敕某等、名居尉察。職在追胥。任百里之佐員。詰四封之姦盜。根株多獲。閱閱條聞。宜旌印綬之榮。擢布弦



歌之政。用優力幹。且信賞條。務濟惠和。往綏細弱。

王昭可濮州臨濮縣令制

敕某。擢居尉察。嘗翦寇攘。尋稽臺賞之條。已結縣同之綬。綸函未拜。直制乃嬰。適御祥琴。追申前詔。用復弦歌之治。益思篋篋之修。

趙貺可相州永和縣令制

敕某。調補都銓。追胥劇邑。善知姦穴之隱。悉得主者之名。株送甚多。邑居以肅。監司言狀。參覆應書。宜從健令之遷。且賞詰姦之效。益圖撫字。無替操修。

宋康濟可青州益都縣尉制

敕某。本繇褒博。嘗舉蹶張。預禽寇偷。遂有班籍。厭走一封之傳。求換半通之綸。俾領追胥。且從志尚。當善恤于民隱。務祇守于官箴。

种世衡男古可鳳翔府天興縣尉制

敕某。男某。爾父。擢以將材。官吾邊部。著首公砥節之效。有典戎幹方之能。適倚扞城。不幸早世。覽觀爾奏。論列父功。因命憲司。攷驗實狀。事雖存于端緒。辭有涉于詐誣。尙念前人。舊著勤績。爲寬法律之坐。俾司簿書之稽。當體寬優。勿忘甄錄。

白舜元可莫州長豐縣尉制

敕某、名書班籍。年在東隅。厭乘輅車。願仕郡邑。亦以餘力。庶幾學文。俾除尉察之員。尙謹追胥之職。勿渝美志。茲懋來勤。

敕賜五經及第孫師旅可鄆州須城縣尉制

敕某、擢以經中美科。預選便殿。今以年合常格。得集中銓。可以試吏服官。詰姦禁盜。無替而學。尙慎厥初。謹視寇偷。善遇黔細。

敕賜毛詩及第王仲甫可光化軍乾德縣尉制

敕具官某、爾擢用專門之學。當中揚庭之科。曾失節宣。謝去唱注。今疴恙良已。而名錄具存。銓部以聞。尉察爲擬。當慎服官之始。勿忘絜矩之修。謹視寇偷。務恤黔細。

李從政可秀州嘉興縣尉制

敕某、擢者自廷尉史。除民曹掾。銓資甫入。書局遯留。會刊定之奏篇。用追胥而改秩。且甄恪效。益守廉規。史館孔目官汪宗益可青州壽光縣尉制

敕某、經署版曹。留寘史觀。肆勤匪怠。習事寡尤。質選格而已盈。稽恩比而當補。外邊尉察。往務勉修。尙書學究及第陳元良可永康軍司法制

敕某、爾擢者經明得科。齒幼未祿。今緇布已冠。而舊學尤通。可以入官。使之從政。往司三尺之律。初有半通之綸。善持丹書。務遵素履。

蘇澄可權蔡州支使制

敕某、朕以震誕在辰，賞延均渥。惟吾政弼之舊，來上公車之章。言爾早預親聯，冀霑朝寵。宜自勾稽之局，權居參畫之筵。尙慎聿修，無忝內舉。

東黃可成州同谷縣主簿制

敕某、蜀郡學者等，鄒魯焉爾。經藝淹通，喜爲諸生之誦說。士矩修飾，往被大臣之薦延。試秩蘭臺，授經石室。雖仕版有所齒，而稟祿未及賦。乃今州將之重，卽吾書殿之望。再形論奏，益堪取信。就補勾稽之秩，勉思教道之方。宜本先儒，以正後學。

孟永寧可新州新興縣主簿充翰林待詔御書院祗候制

敕某、恪奉嚴宸，頗精楷法。籍禁門而惟舊，成寶刻而有勞。特疏一命之榮，且獎六書之善。益專小學，往服茂恩。

御前學究及第李奎可河南府澠池縣主簿制

敕某、齒未及冠，經已中科。勲令待年，今乃應格。成宵雅肄三之志，服初命半通之綸。無忘愛民，其益修己。曹宗壽可磁州昭德縣主簿劉復可陳州西華縣主簿制

敕某等、本纓掖之家，紆使者之紱。藝文略涉，志局方剛。不樂乘輅之馳，來求訟牒之補。爲除班籍，聽入銓流。分勾簿書之稽，尙勉箕裘之習。

進納梢草空名助教制

敕某、日者河流弛于故道。比詔都水議塞決隄。爾能輸下捷之材。〔案〕史記下淇園之竹。以爲捷。原本捷說捷。今改正。以助有司之費用。補州藩之佐。且爲邑里之榮。

高永可試助教制

敕某、爾嘗以藥石事于宗藩。試諸方書。頗知倫脊。命學庠而試秩。去選籍之入流。往服榮名。益思謹力。

在京進納斛斗楚州等第戶房旺可將仕郎守本州助教制

敕某等、金布甲令共給邊費。至于入粟補吏。皆漢法也。以爾本編戶之細。擅居室之饒。能捐我私。以佐公上。俾崇鄉里之化。往服朝家之恩。褒勸在茲。祇受無忽。

成有宗可河中府司錄參軍監汀州鍾賽金銅場制

敕某、比沿銓牒。經佩縣章。亦既終更。適從調集。以州綱之列掾。在冶之別司。往服爾勞。用圖來賞。

明法及第廉正臣可陝州靈寶縣主簿段林可霸州司法參軍制

敕某等、本治臯蘇之律。或通鄒魯之經。對升科榮。各在年妙。今鈐格既及。則官使自宜。往勾邑簿之稽。參司邊掾之任。勉思乃職。勿替攸箴。

張永德可衢州常山縣尉兼主簿制

敕某、以籍在行人。名參上介。度于乘車。號爲寡尤。愍其歷紀之勞。寵以莅官之命。往司尉察。勿忘廉規。

薛安期可益州司戶制

敕某、隸在公府、主發詔函、執勤累年、賞勞有典、授以路藩之掾、寵茲民版之名、用示優恩、尙仍舊局、

學士院驅使官羅整可梓州司戶參軍依舊供職制

敕某、隸屬嚴局、服從煩使、在事條而頗習、奉頤指而有勞、來援舊規、宜有初籍、俾預銓流之補、且從禁苑之留、

新及第進士諸科李育等可幕職州縣官制

敕新及第進士李育等、朕自纂御以來、規恢治道、右文崇術、扶進學者、育材養器、登備時使、親加較試、多所成就、烝然髦士、參照內外、勸導之意、可謂至矣、爾等竝因詔舉、相與計偕、有司籍名、便坐臨試、既第其辭等、復差以爵秩、爾其念進官之始、思臨履之難、善持官箴、無忽民事、咸自修綜、取稱吾恩、

# 文恭集卷十九

## 外制

皇姪宗懿可端州刺史皇姪宗述可右屯衛大將軍制

敕國家承軒祖之詒謀法陶唐之敦族封爵同姓體貌大宗道在維寧恩宜加腆具官某孝恭履德信厚成風具官某性茂溫文體資英嶷並稟玉林之粹悉含銀派之和胥被寵章參居環衛奉朝惟恪居邸有聞朕濟百世之遙源謹九宗之屬籍惟時賢亮司我本支宜酬營職之勞遞遷冢子之秩特升藩刺對總巖除豈惟旌是似之美才蓋以襲乃親之有德惟欽擢敘勿替踐修

皇姪宗樸可貴州刺史皇姪宗藝可左領衛大將軍制

敕分建宗屏參睦本支環設衛官拱扈宸極號爲要職舉屬茂親以爾宗樸迴稟靈華居然信厚以爾宗藝夙成體哲樂善爲猷並茲縣飭之昌咸睦大宗之訓師言是率禮範攸循屬敦敘以崇風宜褒嘉而進秩列城遙刺大將超遷且光闡寄之雄兼衛巖除之重宜懋遵于法度用對越于寵休

皇姪右千牛衛將軍士顥可莊宅副使制

敕某、宗子之良。見推才實。輟于環衛。真我周行。往究汝能。毋忝予寵。

皇親男授官可竝副率制

敕某等、國家神明之後。本枝茂焉。爾等蔚爲文孫。適在穉齒。已勝衣而能拜。且就傅之有期。會嚴祀之涓。成覽大宗之條。請宜優初秩。仍錫嘉名。數從率府之除。滋厚宗藩之睦。

皇親賜名與官海詞可竝右內率府副率制

敕、國家祚出神明之後。慶席祖宗之靈。蕃育文孫。參映皇室。朕乘感誕之節。孚敦紱之仁。澤厚近支。體先異姓。閱大宗之言上。用諸邸之通規。昭揚嘉名。甫班初命。勉勤幼志。虔服茂恩。

樞密使王某親姪孫廷年給事中參知政事劉某親孫男子雅工部侍郎參知政事劉某親孫男  
兼竝可守祕校制

敕、國家誕辰故事。推恩邇列。法得任于門子。禮特優于政弼。以爾等、年妙志美。體安節和。本諸惠訓之深。稔于宵雅之肄。宜有官簿。用冀京司。祇我恩章。勉于學力。

少傅致仕李若谷遺表奏泉州進士薛穎士可試國子四門助教制

敕某、韋布諸生。甌閩遠客。久託名臣之館。近罹東道之喪。素行無虧。遺章有請。用試員于學省。且略選于銓臺。俾有官稱。勿忘士矩。

太子少傅致仕任布孫拱之可試祕校太子少師致仕任中師姪孫元之可試監簿制



敕具官某孫某，朕因感流樞誕節之慶，優安車就第之老，賞其世嗣，延以朝恩。爾等挺生名門，滋承忠教，服士矩而允若，亦地勢之使然。宜有官聯，以漸時使，分從試秩，咸用起家。尙服初榮，益思自勵。

兵部尙書陳執中四從姪孫太初可試四門助教制

敕具官某四從姪孫某，惟爾從祖，任吾大臣。曾高以來，丘墓在遠。若爲疏屬，尙夷平人。守護有年，掃除甚力。俞其章請，試以學員。且奉舊塋，匪敘常選。

故龍圖閣學士禮部侍郎劉筠從孫景純可守將作監主簿制

敕具官某孫景純，夫修廢功，援絕世。聖王之高政，春秋之美意也。以爾從祖，懿德大雅，殊行偉才。逮事章聖之朝，經爲禁林之老。朕初紹宅，稔聞納忠。朝匠亡身，支庶尋隕。烝嘗罔寄，門戶可哀。因命有司，推求近屬。爾少承緒業，親則諸孫。禮存出繼之文，世載爲後之義。俾員大匠，用續前人。往慎爾修，當虔吾詔。

故翰林學士彭乘男敏行可太祝景行可奉禮制

敕具官某男某，爾父號爲時德，服在禁林。遽嗟至哲之萎，且表諸孤之藐。緒言未泯，遺香可傷。用推延世之恩，式寄邇臣之悼。爾等稔聞勲學，滋被教忠。竝因聞禮之餘，差進奉常之屬。尙圖樹立，自致顯揚。

故翰林學士彭乘姪壻王寧可試將作監主簿制

敕具官某姪壻某，早服縫衣，屢干貢部。未有仕版，尙栖衡門。屬予侍臣，今者捐館。閱其遺札，爾則外嫻。來祈恩典之延，用補匠員之試。惟當以藝，無用選爲。

侍讀學士戶部侍郎王拱辰親兄拱安可試將作監主簿制

敕具官某、早列廷臣、屢馳使傳、屬誕辰之數澤、因仲氏之貢章、求實京師、願謝班籍、方倚股肱之郡、用嘉手足之情、寵以匠員、宜茲門緒、往踐官箴之厚、益循士矩之良。

故翰林侍讀學士葉清臣遺表妻兄進士趙淳可試將作監主簿制

敕具官某、妻兄進士某、爾紱冕之餘、伏膺門業、已踰強仕之齒、未及進官之門、近者失吾名臣、弗克柄用、時則遺奏、爾乃外嫻、來求餘渥之延、特越常均之比、試諸匠屬、姑有仕階、尙當勉之、無忝逝者。

禮部侍郎致仕蔣堂姪之器可試祕書省校書郎制

敕具官某、姪某、惟乃仲父、實予名臣、鑒知止于道家、還時事于宰旅、寢延酬賞、參澤近支、以爾業承清門、義均愛子、被風訓而逾劭、聞學尙之足佳、往試祕丘、初有官箴、懋勉時術、奮取世科、以爲慶閱之光、寵不亦美歟。

故工部侍郎致仕楊偕親孫景道可守將作監主簿制

敕某孫某、惟爾大父、若時名臣、方授禮經、謝去官政、如何不淑、奄至云亡、爾惟裔孫、朝有恤典、宜從匠屬之補、用推世賞之延、往服官箴、勿忘風訓。

司門郎中致仕樂安國男溫可試祕校郎制

敕具官某、男某、爾父年老爲郎、章言還政、願回遷授之澤、以延嗣續之榮、爰試秩于祕丘、用承顏于子舍。

勿忘樹立，益務勗修。

職方員外郎致仕王述男孝叔可試將作監主簿制

敕具官某某，爾父剛于爲吏，老滯諸郎，以疾乞年，有章謝事，法得任子，意在養親，祿可奉于旨甘，誼足感于幼艾，匠員往試，門緒勿忘。

駕部員外郎致仕陳淨男枚可試將作監主簿制

敕具官某某，爾父老在郎潛，表還官政，且厚引年之寵，用推任子之恩，試以匠員，續其門緒，卽宜祇命，勿替承顏。

都官員外郎致仕盧器男洪可試將作監主簿制

敕具官某某，爾父著中臺之籍，預外朝之聯，來上奏封，求還時事，願回挂冕之澤，用爲肯構之榮，爾滋服義方，祇勤孝養，往參匠屬，庸示朝恩，且慰家嚴之情，勿忘子舍之恪。

都官員外郎致仕王琥男賦可試將作監主簿制

敕某男某，惟乃之父，有著在廷，嘗授經于藩房，旋倅政于州服，以疾謝事，援比乞恩，用試秩于匠員，俾承顏于子舍，慰茲挂冕，勿替爲箕。

虞部員外郎致仕王周男某可試將作監主簿制

敕具官某某，爾父少從官政，晚寘郎曹，年及杖朝，表求解紱，願以歸休之渥，移爲似續之榮，稽用朝彝。

俾參匠屬往佩起家之寵。勿忘肯構之言。

虞部員外郎周德延男慶之可試祕書省校書郎制

敕某男某、臺郎員外。于法未當任子。朕愍告老之士。著推恩之令。使夫養者有祿。退者無戚。恩用延子。似續。義足感于耆艾。爾父年合禮經。秩在虞衡。章言公車。謝去官政。舉用茲典。往試祕局。當思進宦之難。勿忘奉養之恪。

故王德基男咸有可閣門通事舍人許持服制

敕具官某某、朕悼師帥之臣。殞邊隅之任。思究哀榮之典。併推似續之恩。以爾出自勳門。本諸忠教。著籍廷臣之次。典謁天墀之華。遴于閔凶。越在哀疚。覽遺章之所請。懷前人之弗忘。特升宣納之名。俾進近嚴之列。聽從終制。勿替移忠。

河北都轉運使吳鼎臣遺表奏親孫男承規傳規竝可試將作監主簿制

敕具官某某等、勳選爾祖。使漕朔方。甫寄劇煩。遽嗟奄忽。覽觀遺札。采錄諸孫。用開允于緒言。俾鈞稽于匠屬。咸思祖服之重。往承朝渥之優。

夔州路轉運使楊文舉男彥誠可試祕校制

敕具官某某、爾父委之使傳。往恤吾民。章言公車。祈任及子。且勤巴徼之遠。用延世賞之榮。優以校文。試于祕省。茲爲漸陸。勿忘起家。

淮南轉運使李仲偃次男孝直可試秘書省校書郎制

敕具官某男某、爾父久以清德厚行、名稱朝廷、方委將漕之煩、來援任子之法、爾滋承風訓、瑩有神華、宜試秩于祕丘、用起家于名閥、勉修遠業、祇服茂恩。

故寧遠將軍知棗州田彥晏長孫忠俊可溪洞都巡檢故知富州田承亮弟承喜可銀酒監武知

富州制

敕某等、族依邊徼、世奉闕庭、能撫種人、善靜吾鄙、屬大門之殞、〔案〕此句有脫誤。得使部之奏陳、寵以憲聯、授之勳級、當傾輸于忠力、以承嗣于前人。

故麟州兀羅族下班殿侍三班差使羅佑親男崖可本族副都軍主制

敕具官某男某、以爾族居戎落、代服忠圖、內正聲明、遠為保障、閱守臣之通奏、言爾考之淪亡、用稽世襲之科、俾錫軍幢之號、益思固圉、以美克家。

滿濟置勒噶卜楚男置木磋沙克置伊實男吹置勒沙克置庸蘇男斯結斯清矩嘉奇正男戩巴

勒沙克置揚麻男細斯承續制〔案〕滿濟置勒噶卜楚原文作蒙家叱噶〔案〕原文作捨家也結〔案〕原文作

原文作俱家欺征、戩巴勒、原文作騰彪、沙克置揚麻、原文作捨家養抹、細斯、原文

敕具官某、惟爾之考、奕世居邊、內拱朝風、外扞吾圉、奄從喪逝、良用哀矜、閱本帥之奏陳、求遺孤之承續、

卽其戎落。授以軍會。咸率忠誠。勿墜先志。

集賢相宋庠妻淮陽郡夫人胡氏可成國夫人制

敕、朕慎調元之任。尊置相之儀。選諸具瞻。用正名于茂宰。迹其內助。復加惠于小君。且明朝禮之優。實施壺則之茂。某官某妻某氏。矩儀淑慎。族望華腴。四德之教。婉從二物之經。參濟嬪風。以穩家事。用修惟乃夫子之賢。膺我弼臣之舉。義由協濟。恩用褒嘉。胙而成國之封。光乃慶門之合。采車進飾。象服益宜。往欽名數之華。逾奉箴圖之訓。

平章事龐籍妻彭城郡夫人劉氏可進封彭國夫人制

敕、朕以樞衡大柄。屬于耆俊之臣。乃用車服殊章。旌其賢善之室。蓋進弼之任重。則加惠之典優。詳按朝文。敷施邦采。迹通規而惟舊。昭惠問而則新。具官某妻某氏。柔正含風。閒華表性。挺生勳閥。蹈四德而無違。來歸德門。經二物而有助。曷用哲夫。而圖政。已自小君而進名。胙之大彭。宜是象服。適中階之命相。惟內壺之配台。有升庸進秩之褒。昭積行累功之致。滋峻起家之美。進開成國之封。恩數益華。儀品參稱。當思名器之旌禮。尙勤圖史之詔言。往服寵靈。永孚嘉告。

故引進使果州團練使王克忠妻上黨縣君石氏可進封武威郡君制

敕、具官某妻某氏。爾之所天。嘗經事朕。忽成淪逝。良用畫傷。愍飾之恩。既加于密印。疏封之渥。更及于帷堂。以爾族茂華腴。德彰詔令。服攸箴于圖史。躬乃職于組紉。攸遂靡譏。職良遽及。特升榮于郡甸。慰銜恤。

于家閔宜誓柏舟用虔紼命。

故引進使陵州團練使王克基妻張氏可封清河郡君制

敕朕愍親信之逝有懷若人推封胙之恩用慰其室具官某妻某氏挺于冠族躬乃柔儀作合公侯之門昭宣圖史之訓行無攸遂痛在未亡追用所天之勞申加益地之典進疏郡甸昭示朝榮彌敦正淑之規以對褒嘉之命

濟州防禦使張茂實妻劉氏可封彭城郡君制

敕具官某妻某氏出高華之族稟柔婉之風懿範交修憲言祗率屬巖下之衛方用乃良而闡內之封宜優異等特疏榮于望郡用申寵于名城往祗茂恩益敦淑履

參知政事高若訥姊陳宗古妻可封文安縣君制

敕親有立愛之言澤存及族之義況近司之預政爲同產以祈恩義有可嘉朕亦何愛具官某姊某官妻婉靜有儀賢和自飭從所天而不達誓己志而未忘覽仲氏之善言敘共姜之守節兼回感祀之渥冀得寵章之封析以縣田胙之湯賦往祗茂澤彌勉柔風

禮部尙書同中書門下平章事文彥博妹信安軍判官成偉妻可封永康縣君制

敕本根盛者枝葉茂焉慶旣發于名門澤宜覃于勝族以爾具官某妹文氏矩儀閑遠思理詳和歸于令人綽有賢範雖榮珠履之伉未徹粉田之封惟時哲兄任我元宰沿親闈喜愛之志移合宮進胙之恩因

求絳章願啓湯賦有美謙恭之尙兼圖孝愛之嘉特疏縣壤之腴俾獻慈堂之壽併伸前寵式表重榮

張方平女故殿中丞蔡天申妻張氏可封壽昌縣君制

敕某氏爾父德善在躬參貳機柄均勞于外得謝朝廷延賞致恩國有舊典爾徽柔莊靜嬪于慶門錫以邑封庸示褒寵思永燕譽宜其家人

長安縣君可封仁壽郡君制

〔案〕長安縣君上脫某官某女等字

敕具官某女某氏昔師臣張禹病漢文帝車駕臨問之禹以愛女爲言乃知常情之所不免也今吾肱臣所虧墨奏猶濕且有安昌之請求益石窹之封矧婉範夙成惠問有淑宜裂多城之壤用增湯賦之田欽對茂恩勉循懿矩

定武軍節度使承裕第六女遂寧縣君趙氏可進封長樂郡君制

敕某氏淑婉有儀嬪于良士同天之慶均逮宗親錫封名城用爲華寵

磁州防禦使承亮等女可竝封縣君制

敕某等穆有性範秀發天支已茂穠華之風猶疏湯沐之賦經祝延之紀節廣惇敍以推仁特啓縣田用招邦族往祗寵數尙勉柔儀

防禦使宗旦等新婦可竝封郡縣君制

敕具官某妻某氏朕以震誕之辰因祝延之慶旁均恩施近澤本支以爾族茂蔭華體閒性正少服公宮



之教。居佩女師之篇。作合宗藩。協恭巽饋。遵樞纏之紀節。睦邦族以敦仁。用疏郡君列郡之封。式允大宗之請。析而湯賦。虔我綽恩。

右領軍衛將軍克修所生母李氏可封南陽縣太君制

敕。悼敍之愛。所以睦宗藩。封胙之恩。所以厚邦典。以爾具官某母某氏。性爲淑哲。族本華腴。因乃子之祈恩。屬大宗之獻狀。特疏望縣。用錫美名。宜虔渥茂之思。益蹈謹良之戒。

左龍衛軍大將軍饒州刺史承翊親育母霍氏左金吾衛大將軍舒州團練使穎國公從謁所生母鄭氏右千牛衛大將軍文州刺史宗敏所生母范氏可竝封縣太君制

敕。朕以扶厚人倫。糾綏邦族。爰及祝延之慶。宜推天敍之恩。以爾具官某等所生母。法度自將。矩儀兼劭。挺生宗哲。參茂本支。適因震誕之辰。來控疏封之請。且將崇孝。亦用廣恩。特優縣甸之名。姑徇藩房之美。滋敦柔範。益服寵章。

左監門衛將軍宗翰所生母劉氏可進封縣太君制

敕。天下之風。莫先于孝。門內之治。必本于恩。某母某氏。性婉而和。德柔且正。實生宗子。乃領衛屯。來祈湯沐之封。用順劬勞之報。胙之名邑。錫以命書。往欽茂恩。益修懿矩。

右江溪洞田州知州黃光倩母阿儂可封宣化郡君制

敕。某氏。爾服于遐荒。克有材智。料籍丁壯。勞動顯聞。錫以命書。用爲寵勸。

皇弟安德軍節度使華原郡王允良乳母王氏可封永壽縣君制

敕具官某乳母某氏少率姆訓善治禮防于藩邸有保阿之功惟朝家敦崇睦之典需章有請舊恩弗忘宜疏湯邑之封姑徇藩王之願益圖淑慎進服寵榮

贈鎮江軍節度追封丹陽郡王守節乳母徐氏可封高平縣君制

敕某乳母某氏朕睦邦族之良愍宗藩之逝延錄保阿之舊申加封胙之恩析用縣田進爲湯賦尙慎柔嘉之履往欽褒敘之榮

貴妃大姑張氏可特授典正制

敕掖廷建職參縮內司宮正有僚分條近職竝圖才淑選侍宸嚴貴妃大姑某氏族茂高華德昭婉穆少服大家之訓早聞良袂之風入踐祕塗益彰柔範宜升司正之掌滋示寵名之華往服茂恩恪思慎履

貴妃第八妹張氏可封清河郡君制

敕具官某第八妹張氏挺生慶門參懿柔矩服憲言而有自謹姆教以無違通籍掖庭預長安之外戚選名輿地胙列郡之封君往欽湯沐之榮益懋柔嘉之德

貴妃乳母周氏可特封長安縣君制

敕某乳母周氏柔謹資性保阿有勤闕掖掖之上言求粉田之錫號移別恩而用授明前惠之聿圖胙以縣田爲之湯賦尙勉循于懿矩往祇服于茂章

德妃位聽宣夫人張氏韓國夫人位聽宣夫人張氏竝可封掌膳制

敕某等資承淑茂。選侍禁嚴。欽柔範以無違。臨祕殿而有裕。親承旨。益慎矩儀。用醕年序之勞。稍進膳羞之掌。茲惟爽渥。勿替恪恭。

魏國大長公主親外孫女錢氏可封壽安縣君制

敕朕悼敍之恩。尤尊于外館。彙征之吉。宜擇于近支。以爾某族本華腴。性資韶令。世素傳于帶礪。言早服于箴圖。屬貴主之爲言。乃賢女之攸出。宜疏湯賦。用錫縣田。往承渥茂之封。彌服柔嘉之尙。



# 文恭集卷二十

## 外制

蔣堂可禮部侍郎致仕制

敕、非達人無以蹈止足之美。惟賢者乃能潔去就之分。瞻言舊德。適殿中兵。援經禮以露誠。抗封章而還政。且優哲艾。用遂晏安。具官某。才粹而文。道沖且正。體風識而盡遠。懷資術而本強。進直計樞之嚴。比歷藩房之重。老于政事。故吏道之可師。式是風華。惟名教之爲樂。績宣中外。治盛東南。引周任之有言。遵祁奚之請老。朕方希古忠厚。惜時耆明。稔聞歸志之堅。姑從繕性之適。閱勞煩事。就成美名。周官亞旅之聯。春卿宗伯之貳。峻是饑等。昭我恩章。勉爾嗇和。以永遐福。

王渙可太子賓客致仕制

敕、禮者齒尊舊德。所以尙賢。存道體厚仁俗。所以弼化。矧吾謝事之老。夙懷經哲之風。前識表微。高蹈知止。屬茲成饗之慶。命以增秩之甄。用獎耆明。且嘉澹退。具官某。懿德攸好。雅行是躬。起王國之烝髦。資名門之濟美。被服儒術。緣飾吏文。申翊宗藩。曾惠訓之不倦。艾服官政。固強力之未衰。時用欽于老成。世方

期于策進。而能獨拔昏俗。褫去華軒。率經禮之攸行。務名教之爲樂。固以昭正素之履。發貪偷之風。惟朝廷嘉尚之恩。下歲時存問之詔。而神明克壯。志慮彌沖。會熙典之涓成。貺茂恩而進序。升宮朝之調護。適林岫之晏安。姑遂松喬之游。亦惟綺季之舊。往服休命。益御太和。

蔡黃裳可右贊善王稷可太子中舍人苗存可大理寺丞劉制可大理評事竝致仕制

敕某等。壯年遊宦。皓首棲遲。豈不爾勞。尙困于選。以年力之疲曳。厭王事之驅馳。自陳日侵。願謝時使。京師進秩。朝序升聯。竝增軒冕之華。且慰丘樊之逸。

許上達可太子洗馬謝元振可守國子監丞竝致仕制

敕某等。溘落暮年。間關常選。及此疲薶。願從歸休。意有嘉其自陳。禮難強其不及。聽還所任之政。兼圖既往之勞。洗馬進聯。上庠丞秩。且旌沿牒之久。足慰挂冠之歸。

高牧可太子洗馬徐渥可守祕校竝致仕制

敕某等。調集中銓。參承列掾。或已及皓首。或稍厭折腰。竝附郡郵。願謝曹事。有嘉知止。用示寵甄。儲禁洗馬之榮。祕丘抱槩之美。式光歸志。宜體優恩。

劉忠信可太子中舍人致仕制

敕某。本治曲臺之經。屢更大選之集。衰遲已至。疲薶自言。願解一同之章。尤從三徑之適。嘉其審分。寵乃謝歸。進朝秩于奉儲。致官勞于娛老。

李備可太子中舍人致仕制

敕某、久從銓唱、參預賓籌、稍疲管庫之勞、且有挂車之請、少盡風力、老歸丘樊、宜錫寵恩、以娛晚志、擢參儲案、進服朝闈、足爲里閭之華、尙從廩稍之急、

艾介石可太子中舍人致仕制

敕某、早集選部、晚至綱曹、自陳年疾之餘、不堪官使之劇、願從謝事、當有推恩、特升儲案之華、用爲家閭之寵、姑從所欲、勉務自將、

楊令望可太子中舍人致仕制

敕某、少壯服官、衰遲作掾、能知經禮之訓、願謝紀綱之勞、止足可嘉、歸休宜寵、用真宮坊之秩、往爲里閭之榮、佚老在茲、祇命無忽、

張隨可太子中舍人致仕制

敕某、本階經術之進、歷趨選集之勞、比至都綱、則已皓首、乞身有請、謝事爲高、用遷儲案之華、以慰里門之式、尙思佚老、當體推恩、

孫可度可太子中舍人致仕制

敕某、爾少壯服官、久間關于銓集、衰遲仕郡、尙黽勉于綱曹、居多几案之煩、自陳齒髮之邁、願還初服、且寬至誠、

姜湛可太子中舍人致仕制

敕某、本由治經。早預從政。甫備列卿之屬。且釐外局之煩。引疾自陳。謝事爲請。宜從藥石之便。難勉筋力之爲。寵以儲僚。慰其暮齒。尙勤輔助。當體寬優。

韓松可太子中舍人致仕制

敕某、爾身爲絳簿。籍在銓流。已過亥人之年。頗嗟離蓋之日。能自言于州郡。求歸老子田園。宜進奉儲之華。以爲挂冕之寵。足榮故閑。且慰頽齡。

趙維可太子中舍人致仕制

敕某、奮由一經。困於久宦。遠任州綱之劇。自陳年老之衰。求解所官。且還初服。能遵經禮。宜有朝恩。升儲禁之爲僚。寵家園之佚老。尙勤輔助。往體寬優。

孟朝宗可太子中舍人致仕制

敕某、少超選格。晚至州綱。展公力而弗遺。佩官箴而無缺。自陳衰齒。求謝劇曹。審分可嘉。歸休足樂。宜進承華之秩。用爲故閑之榮。往服寬優。自從頤養。

張正可太子中舍人致仕制

敕某、治經中科。沿牒署令。久預銓流之集。自陳年力之侵。願解縣章。求返初服。感輸勞之且久。在知止之可嘉。宜升窳于宮坊。俾增榮于家墅。



鄭崇德范振竝可太子中舍人致仕制

敕某等進升仕塗。淹移銓序。或爲列郡之綱紀。或寄大邑之弦歌。竝迫暮年。自陳老病。愍驅馳于職事。聽頤養于精神。寵僚選于承華。服朝榮于故闈。用光晚節。當體優恩。

李逢可太子中舍人侯允恭可祕校竝致仕制

敕某等。或治經服官。或入訾署吏。亶無遺力。咸有積勤。至列郡之紀綱。任詞曹之參佐。自陳暮齒。且白縣痾。難強沒階之趨。願從挂冕之逸。特升僚于東禁。用試秩于祕丘。以慰歸與。且嘉勞止。

趙穆可太子中舍人馬宗諒可監丞竝致仕制

敕某等。除吏且久。秉事亦勞。尙滯中銓。俱以皓首。能量己分。自白齒衰。願辭印綬之勞。得從井臼之逸。聽謝官守。仍寵朝榮。秩以儲僚。丞之學省。俾茲燕適。往服寬優。

蘇維岳王敏竝可太子中舍人李克明可國子監丞竝致仕制

敕某等。早集大選。參服外勤。仕至右曹。長于劇邑。或引年知止。或援疾自陳。願歸休于田廬。求謝去于州縣。咸從今欲。併敘往勞。秩以奉儲。丞于太學。慰茲遲暮。便乃養頤。

韋陟可祕書丞致仕加上輕車都尉制

敕某。朕鄙者拜貺于郊。覃渥在位。爾時謝事。法當推恩。渙號早行。餘澤未究。宜遷勳級。用信數條。就虔吾恩。且慰而志。

呂佐可衛尉寺丞致仕制

敕某、粵從版授、真勾簿稽、以侵西夕之年、頗歎東隅之失、願還官事、歸老家園、特優列寺之丞、且慰挂車之意、

楊贊可衛尉寺丞致仕制

敕某、補吏以訾、上言稱疾、求謝遠方之牒、願挂下澤之車、用遷衛府之丞、俾就家庭之佚、聽而輔養、體我寬優、

孟元亨可大理寺丞致仕制

敕某、早趨選集、晚滯勾稽、自陳衰老之侵、且有乞身之請、嘉其知止、寵乃歸休、用升廷尉之平、以慰南岡之步、

皇甫采可大理寺丞致仕制

敕某、早集銓流、晚爲郡掾、不憚斗筲之役、頗用簞簋之修、自白暮年、願返初服、宜承棘路之授、且寵華門之歸、當服寬優、往從怡適、

吳旦可國子監丞致仕制

敕某、爾早集都銓、纔至諸掾、揣繭然之衰幹、識知止之大方、乞骸以歸、稅駕良善、宜寵上庠之秩、以爲舊社之榮、

鄭有斐可國子監丞致仕制

敕某、早從調集、晚滯勾稽、自陳齒髮之衰、願謝簿書之役、服勞有自、知止足嘉、用丞庠學之榮、俾遂丘樊之適、尙續以廩、勉修于家。

張太一可國子監丞致仕制

敕某、少壯從宦、遲暮倦游、來辭下澤之勞、願從初服之逸、進丞學省、參列京司、俾藥石之善持、聽丘樊之自便、往究餘齒、當體至恩。

石待問可太常博士致仕制

敕某、早以敏文、階于俊選、中嬰廢免、再用敍收、遂班文石之朝、已迫虞淵之景、進趨良苦、疲藹可矜、以其早會先朝、嘗承大對、特升司籙之局、用光挂冕之歸、往服優恩、以究餘齒。

趙眞卿可大理評事致仕制

敕某、嘗任勾稽之員、坐受雇更之入、自罹廢免、尋命敍收、掾于嶠南、辭以親老、來謝官使、願從家居、尙矜造士之餘、特寵法卿之屬、勿忘奉養、當體寬優。

翁奭可和州司馬致仕制

敕某、早入銓流、適隨掾牒、附郵引疾、謝事乞身、聽解綱曹、卽授上佐、仍優廩給、當識臺恩。

吳高可撫州長史致仕制

敕某、少隸牙門。晚有班籍。以年力之疲曳。愍王事之驅馳。卽其本邦。授以上介。俾從安逸。當體寬優。

穆介可華州長史致仕制

敕某、早直祕寢之。聯嘗贊禁闈之。謁中因罷黜。尋復甄收。自陳年力之衰。願謝斗筲之役。特優上介。當體寬恩。

李仲連可左清道副率致仕制

敕某、前朝近支。南國餘胄。早有庭臣之籍。比乘使者之輶。煩局所更。敏用無滯。自陳年疾之替。願辭時使之勞。副東京二率之聯。參屬官四品之列。嘉其知止。慰乃養痾。尙體寬優。勿忘輔助。

張保和可右清道率府副率致仕制

敕某、名存班籍。年合禮經。能省己以自陳。願乞身而待盡。嘉其知止。率以副員。尙爲逸老之榮。往欽從欲之惠。

姚可久可左監門衛大將軍致仕制

敕某、執技以進。歷稔且長。嘗首太醫。端正諸使。比閱奏封之上。自陳年力之侵。願謝見官。良合古誼。俾升環衛之列。仍假折衝之名。當體寬恩。以從佚老。

宋榮可左屯衛大將軍致仕制

敕某、早糜勇爵。嘗當軍鋒。奮士戶之積勞。用邊關之勤略。眞諸環衛。秩以折衝。自陳年力之衰。不任軍旅。

之役。願謝時使。得從家居。閔煩宿衛之勞。聽遂燕申之適。益升屯衛。當體寬優。

錢子穆可左監衛將軍致仕制

敕某。服在內聯。綰于外務。繭然疲役。迫是暮年。因郡邸以爲言。求家園之佚老。聽還時事。尙寵衛屯。往服寬優。自勤納養。

耿從政可左領軍衛將軍分司南京致仕制

敕某。領使親宅。典戎近藩。早稱幹能。比更委使。閱奏封之來上。陳老疾之侵衰。願解兵防。乞分留務。愍年力之少盡。勉醫藥以自持。進升環尹之名。關領別京之衛。仍兪子舍之請。就卽縣齋之安。當體至恩。以究遐福。

陳允恭可左監門衛將軍致仕制

敕某。中預禁聯。外監屯旅。當番禺之卑溼。若毒霧之薰蒸。重髓成痾。步趨難力。表解近墀之職。言求環衛之名。願尋疾醫。且謝時事。竝兪所請。勉務自持。

柴貽憲可左驍衛將軍致仕制

敕某。世承累組之華。朝賴敏材之用。籍使聯之舊。早服禁嚴。司邦憲之平。屢當審克。頗著平反之效。稔聞幹裕之聲。衰疾自陳。歸休爲請。特優環衛之秩。用適燕居之宜。尙體曲恩。往怡晚節。

劉吉可右領軍衛將軍致仕制

敕某少壯驅馳。晚暮疲曳。尙有最凡之目。未經甄陟之科。自陳齒衰。求謝官使。有嘉知止。爲敍前勤。優升拱衛之名。寬賜燕申之適。悉從爾欲。尙服茲榮。往遂嘉貞。益頤眉嘏。

# 文恭集卷二十一

## 外制

皇姪宗鼎可贈邠州觀察使追封新平王制

敕凋落近支感深于邦族。追加愍策。恩究于國章。某信厚存誠。溫恭表質。克稟燕詒之慶。有光敦紱之風。鳴玉奉朝。剖符領郡。顧年塗之未艾。在志力之允嘉。遽感疾以歸全。爲廢朝而興嘆。特櫟觀風之印。仍班析壤之圭。用昭追遠之懷。茲示飾終之典。庶幾營魄。尙識寵靈。

故太子太師致仕任中師可贈太子太傅制

敕義重股肱之虧。禮尊冕服之襮。務崇恩厚。取究哀榮。矧聞政之舊臣。早秉鈞以陪朕。乞身未幾。復魄可嗟。追懷鵠髮之良。宜厚密章之飭。具官某。體行明潔。志慮忠純。有秉彝經哲之風。兼砥節首公之操。圖其宿望。屢煩方面之行。資厥老謀。嘗預幾庭之訪。比均勞典。還守本邦。曾是壯猷。亶無遺力。來謝時事。閱煩老成。俾參綺季之游。姑遂松喬之適。遽聞薨落。良用盡嗟。瞻舊人之弗忘。挹餘芬之未泯。追加宮傳之秩。增慰壙宵之靈。恩禮若茲。營魂尙識。

故四方館使新州刺史王克忠可贈引進使遙郡團練使制

敕、禁近之臣。嘗經于委使。哀終之典。當厚于追褒。以爾具官某。階胄緒之華。兼器幹之敏。歷更煩局。游聘殊疆。虔使指以無違。奉官箴而有恪。晦明生疾。奄忽收神。短歷可嗟。愍章宜及。進升使範。參領軍團。庶榮厚。之遊。尙識治朝之渥。

故洛苑使任承亮可贈正任團練使制

敕具官某。爽恤信臣。匪常于邦典。追旌死孝。用篤于人倫。以爾行義修明。材謀敏劭。入祇禁奧。屢謹畏而寡尤。外治劇煩。資恪勤而能力。侍承親疾。踰歷旬時。藥必務于先嘗。目曾無于交睫。因封其腹。遂隕厥躬。可謂殺身成仁。舍生取義。在竭誠之足感。何與善之可疑。特厚卹章。用嘉純孝。褒進戎團之秩。申寵墻宵之遊。庶幾營魂。尙識恩禮。

故文思使遂州觀察使史崇信可贈振武軍節度制

敕、親倚之臣。忽嗟于殲落。追褒之典。用究于哀榮。具官某。材則敏通。性惟謹質。給左右之事。能寡于悔尤。服內外之勞。克宣於忠力。方任能于宿衛。俄遘疾於晦明。奄至淪亡。良深悲慨。追用節旄之寵。申加印綬之榮。在恩禮而有殊。尙營魂之無忽。

故莊宅使李希及可贈眉州防禦使制

敕、崇讓之風。以損己爲美。愍飾之法。用褒先曰榮。具官某。性蹈謹孚。行稱篤實。嘗歷近嚴之侍。屢更煩使。



之勞。享數弗融。殲良已久。生有慶靈之積。蔚鍾似續之良。續考以忠。在朕之右。請回遷秩之典。求贈乃親之官。美志可嘉。恤章奚愛。追升軍禦之重。集增使範之榮。尙歆予恩。往告而第。

李懷贊可贈防禦使制

敕。奉使宣勤。旣凝于前績。念勞甄往。宜賁于厚恩。具官某。性本謹良。材惟幹裕。任乃居于親信。行則寡于過尤。遘疾晦明。收神冥漠。適予心之軫愴。覽而儷之控陳。進飭臺恩。追崇使範。惟稟靈之匪泯。尙禦侮之歆榮。

贈虢州刺史种世衡可賜成州團練使制

敕。朕紀疆臣之勞。愍戎翰之逝。載加賁典。用洽至恩。具官某。深沈有謀。勁幹能力。屢奉典戎之寄。頗著憂邊之勤。館舍早捐。鼓鼙增愴。已伸刺部之贈。益峻團兵之名。魂而有靈。歆我茲渥。

宋昱可贈供備庫使制

敕某。曷以廷臣。委之縣道。會五溪之雜種。掠數雉之孤城。能率官軍。出支賊黨。不幸遇害。遂隕厥躬。有嘉死事之忠。已舉錄孤之典。曲加贈禮。擢正使聯。恩足慰於墟宵。義亦矜于孝嗣。營魂有識。名秩是歆。

故供備庫副使李隨可贈供備庫使制

敕某。素推溫謹。早侍禁嚴。出護外兵。甫還南服。屬嬰無妄之疾。遽興不淑之嗟。有懷恪恭。載深傷蠱。特推卹典。用正使聯。歆我漏泉之恩。慰而游岱之魂。

鄧惟素可贈供備庫使制

敕某、恩以恤往者、愛之殊、仁不遺舊者、厚之至、以爾夙將、謹力、速事、儲坊、奉頤旨而必恭、慎言、樞而寡悔、援乃纂圖之慶、比參侍幄之華、尋遷隸于外庭、俾亞承於諸使、勤庸有積、命秩未優、遽聞喪逝之音、良軫畫傷之意、特正名于使範、用紀績於銘旌、尙識納言、往歆漏澤。

貴妃母夫人曹氏曾祖旭可贈祕書丞祖靖可贈祠部員外郎制

敕、崇威、晚之賢、已昨封于成國、褒祖服之美、益寵賁于慶閭、具官某、履素蹈和、含章用晦、早怡情于丘壑、弗嬰志於軒裳、善旣積於家庭、慶乃滋於宮掖、推本源流之出、恭延恩施之隆、追建禮之禋、曹、疏、祕、丘之丞、秩、用、示、壙、宵、之、寵、尙、歆、朝、綽、之、榮。

皇后姪女婿故西染院使劉永清可贈諸司使遙郡刺史制

敕某、夫、葛、藟、之、蔭、旣、原、于、本、宗、則、葭、莖、之、親、宜、延、于、異、數、以、爾、材、資、通、敏、性、尙、簡、溫、介、諸、使、而、有、聲、幹、乃、局、而、能、力、遠、圖、未、究、壯、齒、奄、零、覽、長、秋、之、上、言、乃、中、宮、之、外、屬、宜、優、褒、恤、用、厚、常、均、持、正、直、于、內、聯、復、兼、榮、于、列、郡、庸、示、漏、泉、之、澤、尙、慰、壙、宵、之、魂。

故貴儀曹氏可追封賢妃制

敕、存、著、盛、閱、沒、有、令、名、念、賢、善、之、早、淪、寢、逾、年、祀、願、褒、榮、之、須、稱、益、峻、品、儀、以、爾、故、貴、儀、曹、氏、參、服、憲、言、交、修、懿、矩、選、自、元、功、之、後、嬪、於、禁、掖、之、中、速、事、先、朝、早、從、後、掖、收、神、惟、寂、緬、太、素、之、何、歸、留、範、彌、芳、藹、祕

庭而未已。申修茂典。追寵列妃。用昭恩禮之殊。且旌才德之茂。惟淑靈之未泯。尙名號之是歆。

宜州刺史宗實故所生母任氏可追封縣君制

敕。朕厚人倫之風。篤戚藩之愛。飾終有典。教孝爲宜。具官某。故所生母任氏。蹈履柔風。誕育宗子。曾享年之弗永。何先露之易零。大宗以聞。近支有請。宜疏名邑之贈。以慰寒泉之思。沒而尙靈。歆我朝寵。

德妃姪亡妻張氏可特追封郡君制

敕某妻張氏。誕生慶閼。蹈履柔風。早歸舊德之門。嘗疏名邑之賦。稔彰淑哲。驟委韶華。託屬列妃。實有葭莩之戚。祈榮望郡。用開湯沐之封。式示愍章。且旌婉範。庶幾近魄。祇服追恩。

觀文殿學士尙書右僕射賈昌朝曾祖緯贈太傅可贈太師制

敕。人乃本于祖。郊以饗夫帝。故朕齋明肅僊。徧裸世室。淳濯祇慄。親祠泰壇。福旣降而孔皆。澤罔幽而弗暨。矧吾宰路之舊。宜伸祖服之褒。某首冠民宗。才經王體。文采表于來世。名聲動于前朝。蓋源深者流長。而德盛者慶遠。臧孫之善。乃有後昆。考父之恭。是開達者。惟燕詒之醴德。挺端右之令孫。光輔本朝。早追崇于前傅。會成熙事。用進陟于維師。寵乃曾門。優我時德。宜肅將於鬯酒。往祇告於文人。

觀文殿學士尙書右僕射賈昌朝曾祖母魯國太夫人栗氏可追封燕國太夫人制

敕。王假有廟。能享親以厚先。禮行於郊。大報天而尊本。極幽明之際。充覆簾之間。竝貺美祥。畢覃惠澤。矧惟舊德。懷乃先慈。宜更大國之封。以爲曾廟之寵。某氏出高華之胄。歸盛德之門。居穆言容。動循法度。服

共儉之訓。中饋是虔。垂賢善之風。後昆以大。時予舊宰。惟爾令孫。材居國棟之隆。慶表里門之盛。是宜象服。遂荒大東。會成報本之儀。益進追先之典。采藝之詠。早契召南。析木之津。抑惟燕舊。申昭異數。尙賁淑靈。

觀文殿學士尙書右僕射賈昌朝曾祖母崔氏可追封秦國太夫人制

敕。郊以報其本。故高燎用升。恩以究于下。雖重泉無漏。所以承天地之竝貺。昭人祇之普施。矧吾舊德之宰。有懷曾妣之慈。宜厚飾恩。用追來孝。某氏。挺生名閥。作配宗公。循召南之國風。能承先祭。佐夫人之家事。罔間內言。貴範留芳。後昆滋慶。令孫嗣服。曩時相予。嘗稽舊典之文。已進小君之號。屬成熙事。益舉顯章。介于山東。齊爲成國之大。昨夫關內。秦蓋故都之雄。尙歆加地之恩。彌篤高閔之祐。

觀文殿學士尙書右僕射賈昌朝祖璉贈太師可特贈中書令制

敕。昭孝息民。禮莫大于郊廟。保姓受氏。德必本于宗祧。熙事遙成。愷澤均被。惟中臺端右之重。資大門慶善之餘。用峻朝榮。聿崇人本。某深中直質。強學敏文。早彰秉德之彝。弗更爲善之度。行高前世。惜人爵之未充。慶在後昆。果棟臣之間出。謨謀三事。儀長百僚。勳用橫祖之文。已寵維師之位。屬成大報。會泛茂恩。申納內史之書。進崇右相之秩。鳳池益貴。禮序增華。尙歆告第之恩。足慰佳城之魄。

觀文殿學士尙書右僕射賈昌朝祖母胡氏可追封魏國太夫人制

敕。朕飭齋輅。祇見于清廟。備法物。肆類于后土。德產之致。精意以享。尊大道。配嚴祖。所以明事上之禮。教

天下之孝。既翕受元祉。則敷施惠澤。不獨專卿厥美。亦使褒優其先。况我大臣。敢格舊典。某氏出高華之胄。歸名勝之門。躬四德之賢。少服從于姆教。經二物之善。早輔佐于君子。遺風尙穆。來裔寔昌。燕翼有孫。元耆在望。擢正名于巖阿。已錫號于參墟。澤旣漏泉。禮宜加地。晉之始賞。魏則大名。參稽于朝。進胙而國。益峻褒封之典。尙祇渥茂之恩。

觀文殿學士尙書右僕射賈昌朝父注贈太師中書令特贈兼尙書令制

敕。朕裸于禰室。明發有思。郊于泰壇。升侑如在。惟天人相與之盛。有臣工協贊之美。言念乃考。豈不爾懷。矧吾揆路之賢。早承家廟之祀。宜褒先正。用峻追章。具官某。學洞本元。行中儀表。早振端朝之譽。蔚懷表世之文。藏用弗伸。早鬱王官之次。乃終有耀。挺生時棟之材。冠別殿之儀形。席文昌之端右。朕所體貌。爾有慶靈。爰當圖任之辰。已峻褒封之典。錫之右相。崇以維師。屬郊報之修成。在國章之洽舉。益進中臺之令。申賁壙背之遊。彌表顯于家閥。尙欽祇于朝寵。

集賢相宋庠曾祖駢皇贈太傅可贈太師制

敕。朕攷慎才傑。緝熙政謀。得詩雅巖巖之瞻。屬以時柄。用春秋尊尊之誼。褒厥曾門。所以崇立輔之儀。厚追遠之典。具官某。曾祖某。履和含正。厚德乘彝。服展季之小官。恬弗以怪。韜次公之遠業。鬱未及伸。慶乃垂于後昆。時則生于上哲。屏藩左右。馮賴謨謀。彘總幾庭。已峻褒先之典。今升宰路。益疏進等之恩。賁寵維師。增榮私廟。往修一卣之告。尙歆八命之章。

集賢相宋庠曾祖母王氏可追封齊國太夫人曾祖母丁氏可追封魏國太夫人制

敕。夫孝必務于本。禮不忘其先。朕選棟材之隆。任以台宰。圖曾世之懿。峻厥儀品。雖褒賢之禮優。亦本祖之義著。具官某。曾祖母某氏。賢明異稟。法訓躬行。修祭職于采蘋。承其先祖。泣報囚于丹筆。裕乃後昆。時惟哲孫。都我茂宰。前陪樞幄之論。追用密章之褒。名爵既新。湯沐宜鉅。進胙東齊之壤。升優全魏之名。滋寵營魂。尙識恩禮。

集賢相宋庠祖曜累贈太師可特贈中書令制

敕。朕選有德。相大政。惟是名數之重。進都巖廊。則宜爵命之加。併崇祖廟。示慶源之所本。亦褒典之攸先。具官某。祖某。蹈道淳深。詒謀清白。浚都之賢。好善世則有聞。太丘之德。可師位曾未達。遺恩在物。留慶鍾孫。挺生時棟之材。進膺袞路之拜。用乂于我。實惟爾先。邁種之美。所滋裕後之祥。乃茂昔樞柄之云總。已賁維師。今鼎席之是居。益兼右相。褒榮借峻。慶靈弗誣。欽此。納書。保爾顯閥。

集賢相宋庠祖母賈氏可特追封楚國太夫人制

敕。亮天工者政之先。尊人本者義之率。惟國爵之重。彌大于孫謀。則家廟之榮。益延于祖配。所以厚民風。而昭國體也。以爾具官某。祖母某氏。賢有至行。穆著柔風。作合名門。盡虔其中饋之美。交修善道。得輔佐君子之宜。覆育垂慈。燕詒著慶。惟孫經哲。若時奮庸。進增湯賦之名。升薦密章之刻。句吳已寵。全楚用荒。尙歆告第之榮。益右充閭之美。

集賢相宋庠父玘累贈中書令兼尙書令追封榮國公可進封鄭國公制

敕相王室者德之盛。尊考廟者孝之隆。惟慶源之深長。則靈氣之回復。時乃冢嗣。柄吾大鈞。屬當贊策之辰。爰與納書之典。恩禮須究。名數乃宜。具官某。父某。位不配才。性惟合道。誠心恕物。仁何止于放廢。陰德在民。慶乃昌于納駟。挺生良器。用乂本朝。曷總率于繁機。已進爽于先烈。三師升冠。二令兼榮。今膺拜于文昌。益進疏于大國。遂荒原武。寔曰陪京。彌昭爵命之崇。滋厚烝彝之薦。尙歆禰室。益右慶門。

集賢相宋庠母王氏可追封越國太夫人母高氏可追封漢國太夫人母王氏可追封秦國太夫人母朱氏可追封燕國太夫人制

敕巖路延登。有國繫其弼亮。親廟崇飾。故事著于追褒。誼惟繼嫡之均。時乃寵靈之洽。具官某母某氏。柔明著範。淑哲含風。以門閥之華。來嬪盛德。因圖史之訓。居法憲言。存著善猷。沒章遺懿。右乃哲嗣。踐于中階。妥當枚卜之初。彌積先慈之感。感章前峻。昨典益加。攷按輿地之圖。進崇大國之號。用昭慶善。胥示恩榮。庶幾原宥之靈。尙識治朝之渥。

集賢相宋庠母鍾氏可追封晉國太夫人制

敕任天下之重。國以賢爲本。稽內治之則。母以子而貴。況存著慈範。而挺生傑才。時則相予。慶緣裕後。宜舉追褒之典。用旌賢善之風。具官某母某氏。出高華之門。蹈柔嘉之則。來儀名閥。承訓大家。間于兩社之占。實在哲輔。徙乃三鄰之學。遂躋大儒。屬當肇位之升。倬冠烝髦之首。粵從樞筦。入正台階。載崇陪幄之

聯彌動累茵之感。褒章前峻。淑德益宜。進胙參墟之封。增昭親廟之懿。厥靈不泯。茲渥是猷。

吏部侍郎同中書門下平章事文彥博曾祖崇遠贈太保可贈太傅制

敕。朕崇饗九房。昭孝萬寓。馨香格于上下。德罔弗歆。恩施浹于幽明。仁斯爲盛。乃瞻同寅之輔。裁成右饗之儀。申飭愍章。褒崇曾世。具官某。素風傳世。美德在躬。行固重于本邦。位不配于高行。前言多識。被河汾舊學之資。惠政所孚。留蒲苾字人之愛。實啓貽孫之慶。孚膺上相之求。自甫正于中階。已迨甄于上袞。熙成有典。覃施及先。益尊帝傳之名。用厚台臣之數。慶餘所復。歆告其承。

吏部侍郎同中書門下平章事文彥博曾祖母宋氏可追封魏國太夫人制

敕。朕以孝饗熙成。靈恩均被。禮柄臣之重。既孚號于大庭。尊曾妣之慈。復納書于私廟。具官某。曾祖母某氏。柔儀異稟。淑德少成。本育粹于名宗。早來儀于慶閱。躬采蘋之法度。先祭是承。茂來葉之燕詒。後昆以裕。令孫挺出。上宰冠居。薌膺枚卜之求。已攷胙封之典。逮茲均施。益用追先。俾來輿地之圖。優封大國之號。采章兼飭。名數載加。尙淑魄之有知。歆愍章之既渥。

吏部侍郎同中書門下平章事文彥博祖銳贈太傅可贈太師制

敕。朕宗祀五室。合社三神。廣烝烝之風。參侑于祖考。推尊尊之誼。施及于臣鄰。用加惠于大門。示本恩于上相。具官某。祖某。循持雅行。惠迪善猷。自州壤以推風。繇家庭之儲祉。孫謀詒厥。資狐突善教之忠。達者與焉。賴考父滋恭之德。若時茂宰。惟乃哲孫。早序正于台聯。嘗追崇于保訓。禮成宮廟。慶洽天人。益峻三



師之名。用厚九原之飾。惟慶靈之回復。尙營魄之歆承。

吏部侍郎同中書門下平章事文彥博祖母王氏可追封越國太夫人制

敕。朕追正郊宮之饗。涓成陽館之祠。秩上下以承神。通幽明而宣澤。發于膚寸。漏及重泉。矧吾邦宰之賢。有懷祖廟之配。曩慈所裕。愍飾宜加。具官某祖母某氏。淑哲成風。賢明可範。服箴圖而無斃。循法度而弗違。作合令門。穆嬪風而彌婉。詒謀後世。階慈訓以寢昌。時惟令孫。持我魁柄。自發揚庭之號。已施飾壤之封。賁象服之遺榮。申密章之時告。屬茲成饗之慶。永言來孝之追。覆按典圖。進荒土宇。增衍采章之等。究宣恩數之榮。燭于壙宵。歆我朝範。

吏部侍郎同中書門下平章事文彥博祖母郭氏可追沂國太夫人制

敕。祀者國之大事。孝者人之至德。明發齋栗。崇嚴配于合宮。滲漉涵濡。漏愍恩于幽窆。瞻言巖宰之重。有懷王妣之慈。稽若舊章。敷于異姓。具官某祖母某氏。族惟甲冠。德本柔嘉。啓遇觀之祥占。歸于夫子。積詒孫之善行。裕我弼臣。比膺注意之求。已飾追先之範。逮茲宗祀。覃及慶靈。益進胙于土田。用申昭于家廟。飾之象服。正以采蘋。惟營識之未淪。尙采章之歆受。

吏部侍郎同中書門下平章事文彥博父洎贈太師可贈中書令制

敕。德之醞者。榮裕于來裔。孝之大者。光昭于前人。朕卜季商。緒正宗祀。哀對六天之大。升侑三后之尊。執相邦儀。時我巖弼。輔成世宗之享。厥有茂勳。申慰考服之恩。宜覃殊典。具官某父某。體仁居厚。尙德秉彝。

惠和濟賢者之風。敏達擅吏師之望。壯猷早謝。惜高位之弗躋。陰德所覃。宜後昆之滋大。蔚興世嗣。光輔朕躬。命爰立于巖廊。敕追甄于禰室。拜以三師之袞。刻諸八命之章。屬茲祀之均休。厚愍恩之追遠。益進鳳池之貴秩。用昭鱣序之慶靈。尙歆右相之榮。當識上台之渥。

吏部侍郎同中書門下平章事文彥博嫡母耿氏可追封秦國太夫人制

敕。朕將饗合宮。先格大室。旣虔鬱鬯之禋。還奉蒼璧之祠。妥侑尊嚴。用度人倫之孝。協共顯相。則繫邦宰之忠。永言顧復之恩。宜厚追褒之典。具官某母某氏。高華著族。柔正含章。賢德式于六嫔。嬪風經于二物。輔佐君子。尊四教之善言。誕育名臣。被三遷之慈訓。芳猷早闕。懿範彌昭。慶在身支。任居肱輔。惟亮工之攸賴。本諸祉之所滋。爰當正袞之辰。尤動累茵之感。追賁采鑿之號。進加析壤之封。時享輔修。孝思增積。稽若朝範。刻用密章。昨茲土宇之美名。賁乃笄珈之盛飾。惟淑靈之匪昧。尙華渥之是承。

參知政事高若訥曾祖諭贈太子太保可贈太保制

敕。國家優于用賢。篤在教孝。故二府登仕。旣馮賴于猷爲。而三世追褒。必究極于恩禮。所尊人本之重。宜厚國政之咨。具官某曾祖某。節峻丘園。風行州壤。眷懷賢業。道不濟于當年。詒燕善謀。慶則蕃于來世。纘乃祖服。時惟孝孫。選自內樞。參我中鉉。勳以東宮之二品。舉用追章。今以天子之三師。升加愍冊。且明有德之後。式表褒賢之先。尙而靈承。虔我賁寵。

樞密使高若納曾祖諭贈太傅可贈太師制

敕國家置使典樞。本兵總務。重茲時柄之委。厚有曾世之襲。抑乃舊章。斯謂殊典。具官某曾祖某。仁爲己任。德秉民彝。靡仕爽于生前。餘慶滋于身後。令孫載誕。近弼是登。寔資陪幄之謀。用翊包戈之治。載稽往策。已賁上公。益先本祖之圖。彌進維師之重。密章以刻。鬱鬯是承。庶幾私廟之靈。尙識治朝之渥。

參知政事高若納曾祖母王氏可追封祁國太夫人制

敕朕圖政軸之貳。錄曾世之慈。旣進律而熙朝。卽納書而告第。所以推迹先懿。歸厚時風。具官某曾祖母某氏。柔範夙成。善猷祇率。族則衣冠之舊。言惟圖史之箴。正宗事是聿修。垂孫謀而云遠。挺生良翰。滋大慶閱。粵從基命之司。預聞本政之議。襲先有典。益疏湯沐之封。裕後顯仁。彌表燕詒之盛。幽靈固在。愍飾其承。

樞密使高若納曾祖母冀國太夫人王氏可追封晉國太夫人制

敕國家法樞置弼。陪幄議兵。策旣告于大庭。恩卽覃于私廟。進襲曾配。抑著朝彝。具官某曾祖母某氏。特稟柔風。休有懿範。詒孫謀而益遠。流世德而逾醲。祥發本支。任隆基宥。先胙封于郡望。已加號于小君。爰當班命之辰。益舉納書之典。按圖輿地。拓土大邦。升恩數以兼常。昭慶靈之滋厚。往歆襲典。尙識茂恩。

參知政事高若納祖審劍贈太子太傅可贈太傅制

敕義率下而重禮治。上而尊章德表賢。旣參聯于宰路。本仁厚俗。必追寵于大門。具官某祖某。文武自將。智略寡二。功名爲任。嘗慷慨以忘家。力命難忱。終咨嗟于抱器。雖貴塗則爽。而慶閱以興。字果驗于升卿。

器有踰于安國。俾若予采。入預政聞。時惟任能。禮有異數。益進上公之秩。用纘乃祖之戎。冀而神靈。祇我印綬。

樞密使高若訥祖審釗贈太師可特贈中書令制

敕。國家經武。須賢纘戎。在孝。繇幾庭而進輔。必祖廟以伸褒。所以旌哲表庸。尊先重本。著茲臺範。厚厥朝風。具官某。祖某。力行體仁。時中合道。恕心是廣。曾醜夷之弗爭。陰德所覃。宜昆雲之有裕。惟孫抱器。若時登樞。探觀告第之章。前用繇師之袞。益兼榮于浴鳳。仍賁采于附蟬。以明達者之興。且驗升卿之効。惟光靈之所屬。尙營識之是歆。

參知政事高若訥祖母追封扶風郡太夫人馬氏可追封澶國太夫人制

敕。厚民在孝。濟政須才。選賢以乂于王家。褒功迺及于私廟。朝有著典。我惟儀圖。具官某。祖母某氏。柔靖自將。賢和無遂。展如姆教之率。穆然嬪則之修。慈範早淪。緒風彌劭。惟令孫之忠力。預近府之政謀。參樞柄之云初。稽納書之惟舊。衍增湯賦之數。追褒翟莠之儀。神而有靈。詔其無忽。

樞密使高若訥祖母衛國太夫人馬氏可追封魏國太夫人制

敕。義乃率于祖。仁必厚其先。乃瞻樞臣之良。有懷王妣之懿。申加禮命。洽被恩章。具官某。祖母某氏。生德業之門。著柔嘉之範。共儉以承于先祭。休昌乃集于後昆。時維令孫。弼我煩務。納忠先哲。方憑賴於高謨。追遠飾終。益褒崇于愍册。溯服章之盛節。拓土宇之優封。胙以近邦。隆茲異數。章慶源之濬發。明慈覆之

遠垂永泯淑靈同歆榮渥

參知政事高若訥父懷謹贈太子太師可贈太師制

敕朝家任賢倚重在于聞政。臣子能仕推本繇于教忠。矧自幾廷入聯宰路。宜疇陟命益峻褒恩。具官某父某仁厚存誠才明韞用。世服義方之訓家承孝謹之風。不偶數奇鬱胸中之素蓄。自他有耀集身後之遺榮。是似克家思皇生國。方均參柄之重宜從飾禮之優。追尊上公申賁英袞。尙虔師保之寵。往歆印綬之崇。

樞密使高若訥父懷謹贈太師中書令可贈兼尙書令制

敕教之忠者子能仕德之盛者宗必興。眷我名臣付畀樞柄。參攷前人之力用。褒爾室之榮。具官某父某稟自誠明樂于名教。含章抱璞惜大任之弗躋。儲慶爲基宜高門之有閱。誕生哲嗣用父本朝。躋參宰路之聯已厚。壙宵之賁上公極寵。右相兼榮。今進翊于萬樞益申褒于二令。顯臧孫之有後庶李公之弗亡。式將印綬之華往修圭瓚之告。先于而廟永右厥家。

參知政事高若訥母追封河南郡太夫人閻氏可追封鄜國太夫人制

敕夫名顯而滋重則禮從而益隆。若乃繇上大夫而典極升小司空而謀政。爵祿彌厚于己茵鼎不逮其親竝宜按輿地之圖書內史之策進疏國壤申寵壙宵。具官某母某氏賢善自持柔明有助。謹召南之共祭穆是嬪儀喜京兆之平反仁于母道克家有子舉國曰賢已試本兵之司復參制政之府。往嘗追于封

胙令增賁于號榮。顯爾誕哲之祥。伸我任能之禮。淑靈匪昧。華寵當祗。

樞密使高若訥母雍國太夫人閻氏可追封秦國太夫人制

敕國家尊樞。弼重兵柄。登進髦哲。已孚號于治庭。推本孝慈。卽班恩于親廟。矧惟妣德。宜厚密章。具官某母某氏。仁淑有儀。賢和居正。從召南之百兩。作合名門。卜孟氏之三隣。曷成大器。陟岵之哀。遘。累茵之感。彌深。自巖坐之參升。已陰堂之追飾。錫土山于成國。賁車服于小君。屬進總于繁機。爰申加于愍冊。紹開廣宇。改胙大邦。具慰寒泉之思。用示蓼莪之報。庶幾營魄。尙識寵榮。

右諫議大夫充天章閣待制兼侍讀張揆弟京東轉運使兵部員外郎集賢校理揆父蘊尙書司封郎中可特贈光祿卿制

敕。朕肅若舊典。祠于明堂。配侑盡誠。永懷三后之烈。褒榮追禮。覃及百工之親。矧吾從臣。兼相儀蒞。瞻言考服。宜厚恤章。具官某。宅性惠和。德基憑厚。位不配于高行。慶乃裕于後昆。挺生似續之良。馳稱競爽之美。敷經便閣。膺選才林。能仕本于教忠。善繼彰于錫類。感恩所飾。故事當優。增賁列卿之名。昭示治朝之法。幽冥匪昧。滲澤其承。

# 文恭集卷二十二

## 內制

皇兄允弼特授依前檢校尙書右僕射充寧國軍節度使同中書門下平章事北海郡王加食邑一千戶實封三百戶仍賜推誠保順亮節守正翊戴功臣制

門下稽若先王制茲大禘謂四時之常祭未極孝思約一閏之小成誕爲精享朕詳按舊禮攷卜孟冬駕言屬車登享祖廟行朝踐之禮歌長發之章惟時親賢預我祠祀盡肅雍之美同懷愴之懷亦旣解嚴宜有褒賞用敷渥典式告大廷具官允弼地則茂親時惟明德繫二南之化躬兩漢之風表儀王家有嚴重之質導訓宗子得祗穆之和兼徽台司開賦王社宿邸彌謹奉朝滋恭而自先甲肇禋申嚴始事率郇滕之諸國逮魯衛之密親侍齋幄之深從昭鑾之近太室戾止廣樂繹如奉亞禩之升極其恭志正赤鳥之履亶無流心祖宗格思祝嘏告止歆乃孝享賜朕祥釐膳肉是頒用先兄弟之愛勞酒斯舉以澤公侯之勤優衍采田益疇眞食仍加功號之美竝昭名數之華國典攸宜家情允洽於戲同寅恤祀旣獲無疆之休夾輔慎徽益保有終之吉往欽厥命永孚于休

除皇弟允初特授特進依前檢校尚書右僕射使持節耀州諸軍事行耀州刺史兼御史大夫充感德軍節度使耀州管内觀察處置等使加食邑七百戶仍賜推誠保順翊戴功臣制

門下百世必祀德厚者流光三歲乃祿文繁則禮緝朕訓四海之孝合七世之靈因時永懷備物親享稔容粲若寶鎮在焉來九服之朝用六代之樂于時藩岳伯舅二三弟兄助祭在茲侍祠有恪嘉饗云究慶賜遂行具官允初體韻詳和性質淳固本賢王之後資聖源之先遙制侯藩委高牙之重留宿京邸奉介圭之朝能慕善猷綽有淑問自祖宗之講祀由奉常以肆儀結佩入齋展輪從蹕清廟在望極駿奔之恭朱芾侍祠有肅雍之美朕以皇祖右饗大嘏告茲熙事備成景福來格還衡肆眚進律疇庸乃眷戚藩益開土宇仍進表功之號更升躡等之階恩禮之隆固先于異姓名數之懋滋表于辱親於戲承積累之祥膺節制之重齋祠參奉靈寵洵加益慎爾猷往服朕命

除皇弟允良持授特進依前檢校司空同中書門下平章事使持節鄭州諸軍事行鄭州刺史華原郡王充奉寧軍節度使鄭州管内觀察處置河隄等使加食邑一千戶仍賜功臣制

門下朕沿康復之慶薦昭報之誠合祀乾祗大陳牲玉先期祓乎路寢申詔約乎郊丘禮文昭明儀體簡大既執量幣獲侑祖宗之靈復因祭膳以親兄弟之國蓋合揚于旒施用均布于福釐矧堯之變時雍始于敦族而周之厚民德由厥睦親式是仁恩揚茲慶號具官允良姿質淑茂體行端莊令問夙昭善猷允履戚藩云建使節是持按圖啓封載擇膏腴之地班槐就列兼崇台宰之儀入侍齋祠居奉朝請有陟恪



之敏得肅雍之和。朕享告成。爾庸惟穆。既飲斯至。乃澤厥勞。鄭伯列于近郊。滕侯先于異姓。班茲盛策。進以崇階。仍增井牧之封。益寵雲臺之號。竝爲異數。用洽至恩。於戲。訖是上儀。布茲大喜。羣工庶尹。旣國典之是孚。至戚密親。在家情之允洽。益慎爾德。以對厥休。

除富弼行禮部尙書同中書門下平章事。昭文館大學士。監修國史。兼譯經潤文使。加食邑實封功臣散官勳封制。

門下中樞治本。裁教化之宜。上相台光。長官師之任。用緝熙于百度。資變正于三階。眷乃右垣。時惟哲匠。委政事而已試。攷名實以相符。誕揚大庭。付畀魁柄。具官富弼。任重道遠。性正德全。閱敏推于上才。博洽通于衆志。撓之不濁。偉量表于彌冲。簡而易從。盛業彰乎可大。首膺魁壘之舉。歷踐禁嚴之塗。蹇諤發于爾躬。啓沃盈于朕聽。曷由樞省。出殿藩房。名聲聳于遠夷。風采繫于諸夏。遂膺枚卜。實契具瞻。朝有偉人。物無異論。持重守正。參濟以和。告猷納忠。一本于治。屬以冢卿謝政。首鉉佇能。諏俊乂之大臣。疇若予采。冠丞疑之上席。僉曰汝賢。是用升自政塗。處以師尹。仍進秩宗之重。復兼史觀之名。衍以優封。昭茲異數。用旌茂諒。允穆師言。於戲。播化鈞而理陰陽。操國柄而撫辰象。惟無心故能感物。惟以虛所以受人。格于太和。繫我真宰。往踐乃位。同孚于休。

除王貽永授依前檢校太師行尙書右僕射兼侍中充景靈宮使彰德軍節度使加食邑實封改賜功臣制。

門下升庸進等。蓋褒德之彝章。均逸待勞。乃優賢之茂典。眷言俊老。久總繁機。乃圖宣翼之勤。俾遂偃休之請。對加尊秩。改治靈宮。諏以剛辰。告于列位。具官王貽永。志懷明勩。識宇冲深。逮事及于先朝。得尙榮于舊館。用絳侯賢子之譽。入續世功。以征南武庫之才。擢居師列。粵予紹宅之始。嘉乃幹方之能。召置機庭。掌我兵柄。周旋一紀。密勿萬微。慕安世之典機。本于周慎。猶韓增之領事。濟以寬和。又牧政而修明。總武經而練達。納忠匪懈。宜力罔遺。遂兼台階。仍冠樞席。常益附蟬之飾。尋還浴鳳之聯。抑乃榮章。愈其謙請。式是耆良之望。深于眷倚之懷。比閱封章。聯辭機劇。敘晦明之嬰恙。因夙夜之肆勤。閱茲高年。累以煩事。聽還溫省之務。特寵殊庭之名。益升右揆之崇。復兼常伯之重。進褒功之美號。拓衍食之優封。有嘉舊勩。益昭異數。於戲。臣鄰之際。貴保于初終。進退之間。思全于休美。勉綏遐福。尙佇敏謀。

除張堯佐特授光祿大夫依前檢校太保宣徽南院使淮康軍節度使加食邑實封制

門下祇修郊報。夙奉廟昭。告虔前人。裸鬱香之酒。大旅上帝。颺標燎之煙。饌食洽于羣神。助祭來于四海。神人感悅。福嘏昭通。樂與臣鄰。均茲休祐。瞻惟近職。時乃內徵。亟酬從蹕之勞。參錄陪祠之勩。用頒慶賜。式示寵優。具官張堯佐。履尙淑均。器懷詳敏。早會右文之治。夙馳居業之稱。發策俊廷。膺斂才之高選。振纓公路。達從政之大方。寢服近嚴。稔更內外。委典京之尹任。峻司會之使名。總治要煩。滋見計籌之善。參圖勤濟。進聯徽鉞之崇。有若孟津。亶爲巨屏。陪我京室。控于河橋。用繫帥節之行。出委戎輪之近。憑熊成治。卓馬來庭。通文石之內朝。進班邇列。陪甘泉之法從。預相緝儀。志力允嘉。事爲咸濟。逮端門之遠軫。稽

大寢之策勳。崇以階聯。拓茲井賦。尤爲異數。用示澤勞。於戲。郊爲國之上儀。有繁敷贊。賞乃朝之茂典。敢廢舊常。往服褒嘉。勉思欽慎。

除曹佾特授依前檢校尚書左僕射充保靜軍節度使加食邑制

門下。朕。勳。嬰。機。務。稍。煩。神。明。遂。滌。慮。于。大。庭。乃。味。道。于。虛。室。吉。祥。來。復。剛。健。無。虧。開。懌。羣。臣。慰。安。億。姓。蓋。二。儀。之。相。沖。子。乃。三。后。之。翼。曾。孫。惠。我。壽。康。繫。茲。保。佑。乃。嚴。祕。寢。合。祀。大。神。以。對。越。于。天。休。用。敷。錫。于。朝。慶。藩。岳。以。職。而。來。賈。臣。工。執。事。而。有。嚴。自。齋。濯。以。潔。誠。速。瘞。燔。而。訖。事。禮。容。疊。穆。氣。象。晏。溫。驗。休。證。之。著。然。宜。祥。釐。之。錫。爾。眷。言。侯。度。用。舉。寵。章。具。官。曹。佾。識。局。夷。通。志。懷。敏。劭。夙。稟。德。門。之。慶。蔚。爲。威。晚。之。華。入。義。府。以。敦。詩。時。惟。良。帥。登。太。常。而。紀。績。世。著。大。功。無。亞。夫。貴。倨。之。風。有。陰。興。謙。退。之。行。居。則。以。列。侯。而。就。第。善。不。近。名。出。則。以。良。翰。而。守。藩。達。于。從。政。近。易。東。秦。之。節。俾。臨。舊。許。之。邦。撫。是。寰。封。陪。茲。京。室。命。書。甫。降。祀。典。告。成。蓋。圖。守。屏。之。勤。參。錄。充。庭。之。上。衍。封。爾。宇。加。惠。于。朝。進。以。茂。勳。疇。其。眞。賞。孚。乃。王。庭。之。號。用。爲。侯。服。之。光。於。戲。賞。以。勸。其。功。祀。以。報。其。貺。惟。前。人。之。烈。已。殞。誓。于。河。山。惟。後。昆。之。賢。復。續。戎。于。茅。瑞。往。服。慶。賜。勉。思。忠。規。

除張茂實特授依前檢校工部尚書充寧遠軍節度使勳封食邑制

門下。朕。勳。以。日。中。聽。政。夜。分。觀。書。雖。禹。湯。求。理。之。心。未。嘗。敢。怠。而。黃。老。養。性。之。術。頗。有。所。虧。賴。穹。厚。之。惠。康。蒙。宗。社。之。敷。佑。善。氣。來。復。吉。履。以。強。恭。卽。路。朝。述。修。祀。事。以。虔。大。報。用。答。元。祺。藩。岳。底。貢。而。畢。臻。神。祇。

呈貺而胥稷薦享之夕。儀物粲然。丹燎告升。休景彌燭。策勳有典。頒胙著文。睿言戎翰之臣。用孚庭號之慶。具官張茂實。誠節果壯。志度深沈。濟美本于勳良。好謀通于奇正。習安邊之將略。善于拊循。佐絕域之使才。得其要領。以忠謹之操。入衛于巖廬。以武毅之風。出分子制。穀牙旗云建。師律有嚴。十國爲連。析普寧之奧壤。萬夫觀政。殿上黨之強藩。封守以安。方貢惟謹。通成熙事。均賦祥釐。參澤內外之勞。昭示幅員之慶。時惟良帥。崇以勳名。仍開衍食之封。益示陪敦之寵。茲爲異數。式顯茂功。於戲。邦國用光。天人助順。康哉之慶。豈獨在予。霈然之恩。庶均維屏。往服茲寵。益慎爾猷。

除李昭亮依前檢校太傅同中書門下平章事充景靈宮使昭德軍節度使制

門下總戎參鼎。兼名器以爲榮。易地建牙。處形勝而斯重。矧惟師弼之舊。久在幹垣之煩。閱是服勞。嘉茲請覲。俾升藩于制閫。命司職于殊庭。參懋勤康。抑惟彝典。用頒明制。固允師言。具官李昭亮。器略深明。誠懷沖厚。稟山西之勝氣。通圯上之祕籍。粵自大門。載忠規于奕世。睿言爾考。著勳力于先朝。稱辛蘇之將家。爲摯任之后族。克生哲嗣。聿濟美猷。亦嘗榦不庭之方。有禦侮之力。入居宿衛。提利兵而誰何。出護將屯。領中軍之節制。擲釐符籥之任。就升袞鉞之崇。逮滿北門之更。復委中山之鎮。苛慝不作。拊循有方。去闕庭。頻移星歲。宜入奉于朝請。特申霈于寵靈。換上黨之節旄。分壺關之茅土。益增眞食。彌衍采田。俾司典密之都。仍踵太清之職。體貌惟舊。恩禮攸宜。於戲。眞祖在天。實右慶靈之祚。瓌宮置使。必先台宰之臣。嚴奉在茲。往欽無忽。

除曾公亮檢校太尉充樞密使制

門下經遠慮微。必慎制兵之術。折衝消難。亦資畫策之臣。是憲樞躔。聿崇使號。蓋政謨之攸寄。匪着哲而莫居。適得其人。誕敷厥命。具官曾公亮。風業碩茂。志慮深純。學多貫于前言。性頗修于中道。有方重之德。可以柅躁而鎮浮。有明達之才。可以造機而成務。嘗講勸于左右。亦召置于禁嚴。敷我訓言。代予明命。間請臨于宸輔。遄擢置于京師。咸有治功。遂聞政本。通明練于百物。參和穆于羣言。貳公之司。久陪于論道。內密之任。宜正于筦樞。仍加傳道之名。更益陪教之數。崇階馭貴。眞食衍封。竝示寵章。式旌殊禮。於戲。典機之任。莫慎乎微。擊柝之言。蓋取諸豫。勿謂承平之久。益思備禦之深。祇服斯言。往踐乃位。

除田況特授檢校太傅充樞密使進封開國公加食邑實封制

門下本兵近司。參置于使號。經武大柄。允屬于材賢。日圖宣哲之良。用舉正名之典。定自朕志。揚于王庭。具官田況。誠志純深。茂才冲劭。寬粟發乎謨德。博洽本乎多文。策從三道之科。置諸四禁之地。得王臣匪躬之節。有國士無雙之風。參賴敏猷。數當大任。保塞蕩平之略。鎮蜀撫循之勞。明智不疑。淵謀善斷。間亦委之大計。試以周才。迎盤錯以皆虛。彌彰利器。汰精剛而不耗。自表良金。擢典內極之繁。稔聞前箸之畫。一乃心而匪懈。研諸慮以惟微。見于忠精。實有成績。參圖俊德。升正機庭。仍傳上公。益疇多賦。崇階是陟。異數在茲。於戲。樽俎之謀。遙制于戎落。樞機之地。上法于斗宮。勉慎乃思。以輔予治。

賜梁適特授依前行尚書禮部侍郎知鄭州仍改賜功臣制

門下褫機政之煩。均屏翰之逸。左右修輔。蓋陟恪之久勞。內外肆勤。在眷毗之一體。爰正庭號。用奮朝倫。具官梁適。局致夷通。性業開爽。入我英毅之選。參干橐從之華。召自複門。侍于邇閣。預贊宰于明命。備進讀于丘墳。嘉謨納于論思。敏用彰于強濟。疊圖制閫之效。擢貳本兵之司。職典樞機。地親帷幄。亟參聞于政道。邇敷燮于辰階。出入五年。周旋二府。苛慝比作。變異重仍。噴有煩言。達于予聽。曾淑聲之莫建。在清議之弗平。屢上封章。求還印綬。朕思全進退之禮。務崇始卒之恩。參錄舊勤。尙仍前秩。以春官亞旅之重。在黃圖右壤之雄。臨長鄭人。頌錄漢詔。於戲。台宰之職。任國之綱維。寰輔之邦。陪京之襟帶。往服茲命。尙體至恩。

# 文恭集卷二十三

## 內制

除韓琦特授依前工部尙書同中書門下平章事集賢殿大學士加食邑實封改賜功臣制

門下春秋大事。載合食之文。建武舊儀。有親祠之典。朕永追來孝。邈企前徽。因時物成。攷古禘祭。具法物之駕。歎神祖之廷。饑采焜煌。牲玉純潔。殊方底貢。羣岳入陪。誠志孚通。聖靈開饗。遙成熙事。誕賦祥釐。翼我盛容。時惟茂宰。爰疇爾賞。式告于廟。具官韓琦。秉志忠純。蹈道夷正。居然時傑之望。司我大政之均。有惟深之明。以通于衆志。有威德之美。以弼于朕躬。而自孝享矢謨。先庚孚號。總乃容臺之議。協于齋殿之恭。率籲臣工。拱侍裸獻。明發不寐。朕深優然之思。嚴假無言。爾有頤若之色。自鬱酒之云灌。訖丹燎之既升。率履弗違。右饗如答。至陽顯見。積晦開消。還御端門。飲至大寢。益以褒功之號。拓茲衍食之封。實賦有加。異數斯在於戲。相予肆祀。既格于休嘉。勉爾亮工。益思于輔拂。時惟良顯。往其懋哉。

除韓琦依前工部尙書同中書門下平章事集賢殿大學士加食邑實封仍賜功臣制

門下亮成天功。實繫于宰職。緝熙王道。允寄于賢才。矧久服于機庭。且周知于治體。俾正中階之象。用膺

次相之文。既攷師言。復涓剛日。式揚孚號。誕告庶工。具官韓琦。志度純深。才器高妙。行足厚于風俗。言必合于典常。立于本朝。毅然懷體國之色。訪以大略。直哉有匪躬之風。曩者。曠俗擾邊。勁兵宿野。始仗指蹤之略。適升基命之階。間從書殿之華。就寵師干之拜。持中山之師節。臨大鹵之盛秋。寂無邊虞。深得戎重。召言還國。申命極樞。總是煩機。議茲舊物。謀而鮮過。慮不及私。備挹猷爲。罄宣忠力。文武參試。固亮節之卓然。台宰對司。在至公之允若。是用參之龜策。付以機衡。仍登書殿之名。更拓上田之賦。於戲。寅亮天地之化。調序陰陽之和。衡石無心。以平而爲體。囊籥有道。以虛而爲宗。勉思此言。同底于治。

除韓琦特授特進依前檢校太保充武康軍節度使加食邑制

門下。朕以天統上正。日晷長至。明發裸于世室。昧爽祀于郊丘。靡神不宗。虔乃有孚之享。登禮必答。擁我無疆之休。訖侍中之解嚴。趨太常而賜胙。時則儒帥。朕之名臣。董齊耳目之師。倚殿股肱之地。議勞惟素。頒賞宜先。用敷慶策之文。聿進崇禋之典。具官韓琦。業宇高邵。風德修明。卓爾傑材之宏。居然皇器之重。體侔金石。介然不易其常。量均江河。撓之莫見其際。更試文武。踐揚藩朝。秉是精忠。濟之明識。早著勳于西略。旋翼務于內樞。參斷幾微。交修久大。匪躬之故。慮不及私。造膝之謀。舉無遺策。迭更出處。交厚眷毗。常山臨代之衝。大鹵近胡之地。悉號勁兵之處。委臨制閫之雄。建以高牙。成茲安枕。會卜郊于三歲。庸薦禮于百神。列上計書。述修貢職。率先乎羣岳。旅次乎大庭。逮朱燎之訖儀。及玉車之還軫。孚休字縣。覃施臣工。乃瞻元侯。特崇貴級。用加地進律之法。申拓井開賦之恩。飲至勞旋。厥惟舊典。疇庸進等。茲示茂恩。



於戲郊廟虔恭。乃承敷佑。君臣敕戒。惟是幾安。獲此康年。成于大報。思與俊舊。永底顯休。

除文彥博特授檢校太尉同中書門下平章事使持節孟州諸軍事行孟州刺史充河陽三城節度使判河南府兼西京留守司畿內勸農使加食邑實封制

門下四輔居中用緝熙于邦采二伯治外亦藩屏于王家雖易地而略殊在殿邦而迭重眷言茂宰求解冢司有嘉靜退之風特舉褒優之典兼徵台鉞誕告臣工具官文彥博格量冲深體用安重資疏通之明識蘊強濟之敏猷卓爾偉材本克生于王國居然奇璞早見器于宰朝拔自時髦經我世務歷樹風于方面亟聞政于宰司屬以盜發甘陵氛生朔壘義能首奮師以凱還名繫民瞻功惟朕念爰立作相遂正三階之文用乂于朝乃總萬樞之務速分垣翰遍授旌旄開幕府于長安委節制于全雍眷求予弼圖任茂勳式序上司復光舊物居百度將明之重比歷暄涼在三事弼諧之先尤彰夙夜方篤仰成之眷遽陳謝去之章諭言且勤誠意頗固興化致治雖資秉哲之良均逸偃藩亦廣養恩之義姑從所欲仍示寵章榮以鳳池輔之虎節析孟津之茅瑞委洛宅之符書加衍土田申崇功號悉舉疇庸之數誕昭懋賞之文於戲出處之方竝揚于休命進止之度有美于庶言往惟欽哉無忘夾輔

除文彥博依前檢校太尉充忠武軍節度使授特進加食邑制

門下朕具法物之駕自宮徂郊崇精意之禮奉特與璧紹正鍾律被飾典文哀對于上神參佑于列聖燎熏焜耀雲景杳冥降福協于孔皆祝釐難于專嚮矧惟時傑早陟冢司倚居夾弼之崇領帥輔邦之重宜

優羣后均沐靈休。具官文彥博。志度淵沖。體範明劭。抱公台之偉器。肖辰象之至精。際會盛期。迪宣遠業。沈機先于大蔡。勁節表于疾風。著投袂勤王之勞。清于朔壘。應吹沙作相之兆。變我辰階。迹美規隨。志存幹翼。避丞疑之上席。委節制之中權。張我天聲。帥于雍部。圖金城之方略。參寄老謀。撫井鉞之師兵。坐資雄概。益重出藩之望。用紓西顧之憂。屬以清廟告虔。紫宮拜祝。述修祀貢之職。率循侯度之儀。夙尚忠圖。益欽志嚮。速展成于元祀。惟肇敏于舊勳。賞不可淹。禮宜加腆。爰頒獎策。用進崇階。卽優衍之前封。廣陪敦之異數。於戲。乾祗開佑。乃歆至治之馨。潘岳屏毗。以底中邦之靖。益圖夾輔。永服休嘉。

除宋庠河陽三城節度使檢校太尉同中書門下平章事判鄭州制

門下古者謀帥必本于詩書。雅云憲邦實繫于文武。卷言後老久典煩機。比陳控避之章。宜舉閔勞之典。有嘉舊德。早正中階。宜升節制之榮。仍寵台司之重。誕揚孚號。頒告外朝。具官宋庠。爲時耆英。秉德純粹。通于道德之韞。濟以文采之華。躋自機廷之嚴。入正巖郎之拜。輔相厥辟。協泰象財成之宜。偃休于藩。得大雅進止之度。頃從列屏。召置首樞。咨帷幄之籌。賴楨俎之算。直濟行己。粹密存誠。溫樹不言。奏章隨劄。參萬幾之務。均三品之更。夙夜惟寅。耆艾斯久。出于兢畏之性。比形挹損之言。表解洪樞。請行外闔。是用輟從前箸。寵以命圭。崇利建于盟津。便均勞于鄭圃。師干之試。蓋寵于元猷。台鉞之崇。用褒于哲輔。優封拓井。眞食加田。茲示便蕃。以嚙密勿於戲。左右陪輔。地雖重于二樞。內外屏毗。義則均于一體。往服朕命。以藩王家。

除宋庠特授檢校太尉充樞密使仍賜功臣制

門下效法斗宮崇建樞省翼萬微而置使必取傑才聯三事以兼司用優俊老抑惟舊物申告正朝具官宋庠博洽藝文休有道德方重而不倚直清而無徒蒼壁方琮追琢成于祕寶黃鐘大呂考擊見于正聲往在朕初得之首舉典策光于施命臺閣練其舊章啓沃善言進必依于義理束修雅行靜有補于風華嘗升號于機庭遺正名于中鉉性資慎重問溫樹而不言志在將明恥衰職之有闕謀謨日淺靜退可嘉偃休歲深素履彌劭屬以內樞闕職前著待籌圖舊是先選衆攸舉登我碩德議茲煩機論道本兵在二司而均重秉文經武亦一德之參圖俾升台宰之名仍衍土田之賦崇茲掌武昭厥殊章於戲戎事維艱人謀匪易吉之先見蓋韞于幾深擬而後言以成其變化昭我舊德豈忘訓辭往體朕懷以全慎道

除賈昌朝特授依前檢校太師同中書門下平章事山南東道節度使進封許國公加食邑實封制

門下朕廼者夙興聽斷日昃劬勞三愼凝懷暫屏于煩慮九乾資氣過納于太和蓋穹祇之擁全繫祖宗之保固乃卜季秋之吉奉祠路寢之嚴始升薦于齋誠庸答揚于景貺執事有恪暇假無言升燎告成休氣夾擁思與羣后均被蕃禧再崇進律之文宜先主篇之望具官賈昌朝材居邦傑德映民宗經術號夫通深謀謨推于閎博便朝講勸早授道于朕躬冢司弼諧嘗用父于厥辟休有風業著之巖廊躡辭政軸之勞游委師干之總三階之象參耀于乾台二南之風載融于道化眷言朔土重莅別京當洪河渤碣之

流臨天街畢昂之次。屏毗王室。安輯戎疆。厥庸居多。乃望惟穆。屬鉅儀之云究。當慶賜之遂行。賞蕃宜之功。詩美申伯。賜文武之胙。傳尊齊侯。是用爵以上公。邦之舊許。仍徹上田之數。益崇井賦之真。舉是寵嘉。竝優哲艾。於戲。祭則受福。敢專在于眇沖。賞以懋功。諒無踰于俊老。往服乃命。永孚于休。

除賈昌朝行尙書右僕射依前檢校太師兼侍中充景靈宮使充鎮安軍節度使加食邑實封仍改賜功

門下崇器大名。必歸俊乂之德。繁機劇柄。重累元耆之賢。特推進律之恩。恩解持樞之任。仍伸舊典。用預殊章。涓乃剛辰。告示列位。具位賈昌朝。道器明遠。德範沖深。蔚爲儒宗。達于治道。隕然公輔之量。夙表大成。卓爾巖廊之材。早彰厚質。自膺枚卜。遂正阿衡。盛業著于規隨。嘉謨盈于啓沃。曩辭魁柄之重。再司留籥之嚴。撫全魏之都畿。領北方之節度。左右修輔。抑惟舊學之臣。內外屏毗。亶著老成之望。仍屢辭于尊秩。且益表于謙風。曩者渴見儀形。召還樞宥。彌罄同寅之節。逾昭秉義之忠。惟機務之煩然。且神明之勞止。本兵經武。雖深賴于老成。均逸代勞。姑寵綏于碩德。眷言舊物。申舉前恩。兼東臺常伯之名。正文昌右相之重。陪我京室。書社淮陽。仍總治于靈宮。益衍封于采地。用優俊老。式示寵章。於戲。羣務幾徵。有嘉于匪懈。上卿進退。實美于無猜。惟我輔臣。往體朕命。

除賈昌朝依前檢校太師同中書門下平章事安國公充山南東道節度使加食邑實封改賜功臣制

門下肅若齋輅。類于陽郊。合祛天地之尊。〔案〕祛字原本誤作祛。致漢書倪寬傳。陟配祖宗之聖。奠合祛于天地。祛從示不從衣。今改正。陟配祖宗之聖。奠壁而精志達。升燎而瑞福通。還霈寵靈。均敷貺施。欽嚴主籥之地。我有宗臣。瞻惟賜祚之功。疇先伯舅。宜頒獎策。以洽舊儀。具官賈昌朝。經爲儒宗。才乃朝匠。雅有威德之美。韞于精識之微。迪厥誠明。蹈中和而範俗。遂于術略。躬文武以憲邦。擢入冠于台司。實委成于魁柄。體有巖廊之重。志存王室之先。密勿訐謔。衆話言于三筮。遂巡退讓。穆風化于二南。進兼台鉞之崇。入儀書殿之重。再光舊物。還殿北門。撫茲畢昴之疆。安于常俗之鎮。底乃嘉靖。賴于著明。甫修郊報之儀。首虔方貢之職。壯猷可尙。美志逾昭。屬熙典之迄成。願寵章之昭舉。申加功號。開衍食租。胙井牧之眞封。竣雲臺之美稱。參寵持衡之舊。庸昭進律之殊。於戲。禮縟文繁。氣調時豫。惟帝享此。奚德致之。思元首之歌。幾微之必以戒。念成命之頌。恐懼而不敢康。獲成上儀。嘉與舊德。率由茲道。茂對天休。

除王德用特授依前檢校太師同中書門下平章事兼羣牧制置使充樞密使河陽三城節度使加食邑實封仍改賜功臣制

門下內樞之地。上範於斗宮。前箸之籌。參寄于人傑。以經常武之事。是號本兵之司。圖冠厥名。疇總予務。乃眷元侯之長。早崇右府之聯。爰擇剛辰。復還舊物。具官王德用。志懷果烈。風概沈雄。通于奇正之謀。居然間傑之氣。春秋閱禮。韞義府以惟深。甲令書忠。載世家而有舊。比膺推轂。游歷干城。先十乘以臨戎。長萬夫而觀政。德刑具舉。威惠參施。能名播于外夷。沈機隱于敵國。擢咨俊望。擢典繁機。翼濟事功。迪宣忠

力孚乃識而匪懈。研諸慮以惟微。旋均基宥之勞。亟樹蕃宣之治。蹈險夷而一致。服忠孝而兩全。簡在朕心。洽于朝聽。是用升鳳池之寵秩。聯虎節之榮章。倚殿輔邦。用陪京室。屬右樞之缺職。咨羣岳以擇材。僉曰汝賢。宜弼予治。蓋天子二老。出以居方伯之尊。寰內諸侯。入則處公卿之任。抑惟曩制。舉是隆名。用起壯猷。使纘舊服。仍峻雲臺之號。兼增井牧之封。式厚耆英。有加名數。於戲。樞機發令。制戎事以惟艱。樽俎折衝。經人謀而匪易。往慎乃位。益思其忠。

除王德用特授依前開府儀同三司檢校太師同中書門下平章事充樞密使河陽三城節度使  
進封魯國公加食邑制

門下。朕屬者穹厚降康。祖宗介福。三壇新命。見錫于壽域。萬宇歡心。同均于愛戴。思答揚于貺施。乃祇祓于禁嚴。合祀大神。參侑先烈。四海駿奔而助祭。羣后肅雍而在庭。薦鬯而精意通。升燎而靈氣格。敢專享于純嘏。思均澤于庶工。爰舉寵章。宜先近弼。具官王德用。沈雄植操。明允抱誠。毅乎有師帥之風。侃然通軍國之務。出于勳閥。濟奕世之忠規。冠厥樞庭。擅本朝之宿望。以謹質而被倚愛。以慎重而典幾微。處進退而無愠容。歷夷險而有常德。中間謝事。尋還內密之司。久試益忠。能保後彫之賞。處節旄之極寵。兼台鉉之至榮。耆艾之節益堅。謙挹之心彌固。侍我祠事。煩茲老成。用圖陟恪之勤。參錄寅恭之志。加地進律。于以荒于大東。疇德表功。茲用陪于多賦。益疏真食。舉洽至恩。滋寵壯猷。式頒獎策。於戲。君臣一體。有休恤之均同。天地合社。宜蕃禧之康共。往服茲命。永孚于休。

除龐籍特授檢校太傅昭德軍節度使永興軍一路兵馬都部署安撫使兼知永興軍加食邑實封制

門下稽若前王拜于太師。或跪而推轂。伸其制閫之才。或齋以設壇。崇茲授鉞之命。矧惟迪德之佐。抱乎全器之能。載涓日策之良。爰委師干之試。頒夫明制。告于廣朝。仍資分陝之行。實允憲邦之望。具官龐籍。精明異稟。英博多通。自通服于邇僚。旋敷聞于大政。沈謀至策。蔚懷人傑之姿。碩德壯猷。實爲王室之老。日者種羌負固。邊部繹騷。將武庫之精兵。護延安之絕塞。資其智略。宣我威靈。速河曲之懷柔。屬邊亭之撤警。沿其雅意。置諸本朝。文武參施。顯偉才之絕備。台樞迭踐。見盛業之交修。彙均逸于近藩。邁進儀于祕殿。教條所賦。苛慝以消。休有勤勞。孚于羣聽。屬以長安闕帥。西夏須才。圖雄俊之寶臣。疇綏予衆。正嚴莊之師律。僉曰汝賢。是用按上黨之封。因名闕之固。析茲茅瑞。徹彼土疆。仍光傳道之名。兼實陪敦之數。前驅六韜。外冠十連。洩茲鶉首之郊。頒我虎符之政。以寬西顧。爰屬老成。於戲。茲乃舊都。厥惟全雍。爾其將節制之命。審控帶之宜。從外折衝。矧羈縻之有素。居中作扞。惟安輯之在初。善撫朕師。往對休命。

除龐籍依前尚書戶部侍郎知鄆州仍改賜推誠保德翊戴功臣散官勳封食邑實封制

門下圖治之世。宜本至公。預政之門。合防嫌疑。矧居四輔之首。尤在百僚之先。苟罹干請之名。殊失仰成之意。兼沿章削。俾解政機。具官龐籍。志度淵冲。業宇明劭。韞才謨而敏達。更事典以淹通。早翼務于本朝。游服勞于近職。雅有風采。蔚著猷爲。乃者西州用兵。延安近寇。屬輕裘之謀帥。煩籌筆以制邊。戎索以濟。

夏人來附。乃眷西顧。予嘉乃勳。始召置于樞庭。旋擢參于宰府。闔外無事。頗見于匪躬。天下旣安。允膺于注意。遂正斗樞之號。邁升邦鉉之名。固宜厲以正方。繩于羣下。而乃親聯交構。私謁彰聞。逮有司之訊詞。合杜門而待罪。及行弊斷。乃失重輕。致公議之弗容。在人言之莫遏。尙矜舊德。兼覽奏函。聽避位于台司。俾均勞于藩服。委東平之安輯。便樂土之康嘉。於戲。罷免之科。蓋拘于典制。進退之禮。用正于臣鄰。勉賦寬條。弗忘曩效。



# 文恭集卷二十四

## 內制

議樂詔〔案〕是詔在皇祐一年閏十一月。

朕聞古者作樂。本以薦上帝。祀祖考。三五之盛。不相沿襲。然必太平始克明備。周武受命。至成王時。周公始大合樂。以和邦國。漢初亦沿舊樂。至武帝時。始定泰一后土樂詩。光武中興。至明帝時。始改大予之名。損益前後。以制樂節。唐高祖造邦。至太宗時。孝孫文收。始定鍾律。明皇方成唐樂。是知經啓善述。禮樂重事。須三四世聲文。乃定國初。亦循用王朴。竇儼。所定周樂。太祖患其聲高。遂令和峴減下一律。真宗始出聖意。大祠用樂。又議隨月轉律之法。屢加按覈。然念樂經久墜。學者罕傳。歷古研覃。亦未究緒。頃雖再三攷定。博訪知音。終未有的。究古今。知聲知經。可信之人。嘗爲更改。未適茲意。如其制作。益須切當。宜委中書門下。集兩制及太常禮樂官。將天地五方。神州日月。宗廟社蜡祭享。所用登歌宮縣。審更定奪。聲律是非。按古合今。調諧中和。務要議論允適。經久可用。垂信不朽。使祖功宗德。發揚無窮。神祇感格。善氣來應。苟獲至當。何憚改爲。但審聲驗書。二學鮮竝。互詆胸臆。無所援據。慨然希古。靡忘于懷。尙賴洽聞。共圖盛

節。故茲詔示。想宜知悉。

諸后祫享依舊詔

朕惟春秋大事。在于禘祫。前詔太常。崇按舊禮。期以孟冬之吉。躬祀祖廟。庶因合食。聖靈相接。以廣烝烝之孝。而一二禮官。因別廟四后。有疑論焉。訂之諸儒。議久未一。深惟祖宗之制。至重至尊。祖宗以來。有司攝事行之久矣。祥符中。復經聖考著明詔。當時禮官講求。已云莫可廢也。矧茲眇末。甫崇孝享。其敢廢先妣之舊典。常禮重違。先帝之聖志哉。今親享在邇。未可輕議。其孝章孝惠淑德章懷皇后祫享。且依舊典。候過大禮。令禮官重加討論。咨爾輔臣。務于仍貫。故茲詔示。想宜知悉。

孟冬親詣太廟行祫享之禮御札

朕願循菲質。膺守聖圖。潔幣玉以事乾祇。嚴圭鬯而奉宗廟。惇修將禮。舉秩無文。亦嘗復耕藉于靈壇。恢宗祀于路寢。斯性匪愛。靡神不尊。用能誠志達于幽明。馨香格于上下。靈休見擁。至治用康。永言孝思。有懷先烈。惟祫享之義。著經禮之文。大祭先王。合食祖廟。盛迪嘗之薦。深肅僂之懷。追孝奉先。莫斯爲重。茲享之廢。歷年旣多。有司所存。出于假攝。禮之將墜。朕甚惜焉。卜以孟冬。備茲法駕。款于太室。親薦嘉籩。宜示先期。以伸誕告。朕取今年十月內。擇日親詣太廟。行祫享之禮。其今年冬至親祀南郊。宜卽權罷。所有合行諸般恩賞。竝特就祫享禮單。一依南郊例施行。至日朕親御宣德門宣制。仍令所司詳定儀注。以聞。務遵典禮。勿俾煩勞。咨爾多方。咸體朕意。故茲札示。想宜知悉。

皇祐五年南郊御札

敕內外臣僚等。夫四時常祀。戒在有司。三歲親祠。敢稽舊典。迪惟列聖。光施冲人。獲執牲瑄。以事郊廟。永惟欽慄。弗敢怠違。間亦耕藉。而供粢盛。宗祀以虔。珪幣合社。天地參侑。祖宗庶幾告誠。豈曰能饗。惟時上帝。賜朕有年。嘉生順蕃。黔細滋殖。豈瑣涼之致此。抑右序之俾然。矧今區夏。謐如風雨。時若鐘石。甫就壇場。在望四海。助祭。埃蒼壁之舉。百神受職。係皇邸之設。思欲裸鬯。酒于世室。進純犧于泰時。因以昭孝範。俗延祉庇民。敢憚必躬。而廢大報。朕以今年十一月四日。有事于南郊。咨乃攸司。相予肆祀。各揚爾職。勿懈于位。諸道州府。不得以進奉爲名。輒行科率。務循靖壹。勿使煩勞。咨爾庶邦。當體朕意。

禁內降詔

朕紹承駿烈。祇服先猷。蹈道以臨庶邦。謹憲而持大柄。馭之于奪。正以賞刑。悉任至公。靡容紊法。比有愴幸。肆興妄圖。或違理覬恩。或負罪希貸。率求內出。間亦奉行。蠹政虧風。莫斯爲甚。雖屢頒于詔約。曾未絕于斯途。兼慮臣庶之家。近貴之列。交通請託。巧詐營爲。陰致貨賕。密輸珍玩。賚緣結納。侵撓權綱。方務澄清。當嚴禁詰。儻復違犯。斷在必行。重念成湯。以六事責躬。女謁苞苴之先戒。管氏以四維正國。禮義廉恥之具張。矧宗祀之涓成。屬祥釐之均被。嘉與中外。絀此非衰。勉于自新。以隆至治。今後應內降指揮。特與恩澤。及原減罪犯者。竝仰中書樞密院。并所承受官司。具前後詔條執奏。不得施行。及臣庶家。如有潛行賄貨。結託貴近者。並令御史諫官。覺察論奏。咨爾丞弼。體朕意焉。故茲詔示。想宜知悉。

賜百僚乞御正殿復常膳不允批答

朕奉承聖業。循守政綱。旰夕固勤。冲晦罔識。謹告自上。壤食爲災。日月之行。誠有常度。春秋之戒。則在正陽。遠觀前王。臨制大器。或遇裁而懼。或罪己以興。莫不深蹈兢危。躬自菲薄。僅能消復。或底和平。矧在寡涼。敢妄降挹。是用避路朝之坐。損大官之庖。庶幾感通。有所開右。卿等義均休戚。情深愛戴。願臨正寢。祈復常珍。雖嘉乃誠。難徇斯請。勉思勿懈。以輔不及。書不云乎。無疆惟休。亦無疆惟恤。

賜宰臣富弼以下上第二表乞皇帝御正殿復常膳不允批答

夫元者。三朝之吉日者。衆陽之宗。厥有食焉。茲用惕若。豈予弗類。在治未昭。天其警諸。變或在是。探觀前載。敷求哲王。或罪己以興。或遇災而懼。庶幾菲薄。以昭抑畏。是用損去常膳。退即便朝。期底和平。以消災慝。僅踰旬浹。未覺勤疲。而卿等率籲臣工。繼陳章表。請御正寢。求復庶珍。雖愛君之心。良篤于義。而應天之道。要當在誠。第嘉乃陳。難議其可。

賜皇兄允讓等上表乞皇帝御正殿復常膳不允批答

朕纂膺乾統。劬勞日昃。思又庶政。以登至平。寡昧典昭。未識厥路。上天降咎。正陽有食。豈非明不能燭。治有大虧。天其警予。慎思其闕。是用避正朝之坐。損內饗之膳。恭默計過。恐懼眞懷。庶感通于昊蒼。獲消救于氛慝。卿任居宗翰。情均休恤。勉修所職。以輔不逮。皆乃御法宮之黼座。復大官之鼎味。雖嘉誠愛。難俞章削。

賜皇親批答

夫月書王正表年之所謹。日象君德乘陽而弗虧。惟端朔之辰。有壤食之異。豈智臨之或爽。將道化之未孚。發見陽明。開示乾戒。用損去庖品。避居路朝。惕厲以寘懷。淵默而思咎。庶消陰慝。以底天和。而卿等在親賢。義同休恤。繼形章請。再達予聞。願臨正屏之朝。祈進常珍之品。誠存愛載。辭甚懇勤。姑務省修。以圖消復。雖嘉美意。難俞來請。

賜北海郡王允弼上表謝皇帝御正殿特賜俞允批答

初炎紀朔。大明致虧。日官以言。天象垂戒。是以避路朝之坐。損膳宰之差。冀緣惕厲之誠。庶通消救之道。而羣公庶尹。宗邸親良。迭敷乃誠。稔達予聽。請御當陽之坐。祈復兼珍之餐。章削紛盈。誠節款到。已嘗開許。煩有敘陳。

賜宰臣文彥博以下上表賀今月四日皇帝御崇政殿疏決刑獄五日降雨批答

近以春土可耕。時澤猶爽。密雲屢族。宿麥將瘁。申禱未驗。用思孔疚。顧哀都獄。豈無寃人。夙興便朝。分條繫者。親加慮問。率俾降原。冲志獲通。休應來表。纔翊日而協氣至。未崇朝而甘施洽。消百苛之欲作。紓三農之勤望。感召潛契。朕誠悅焉。雖協哀矜之期。亦繫敷燮之助。卿等心存理物。善在稱君。亟剡奏函。願書信策。深昭將順之意。尤多嘉尚之懷。

賜宰臣陳執中以下爲上表賀崇政殿疏放刑獄卽時降雨批答

朕以雩祀既虔。時澤未效。秋種所急。夕惕用勤。顧哀邦氓。牽陷都邑。其中繫者。豈無冤焉。傷和致災。或恐在是。因臨便殿。親爲慮囚。且示哀矜。悉從原降。書不云乎。與其殺不辜。寧失不經。未旋晷而和氣通。弗崇朝而嘉澍洽。驕陽以屏。豐歲可期。卿等地在。弼諧志敦。將順遽閱。奏函之上。願從信策之藏。載省寅恭。良多愧尙。

賜文武百僚陳執中以下上表賀爲今月一日太陽當蝕虧分不及算數并陰晦微見詔

邪慝侵陽。推步在朔。肅若乾戒。惕于朕心。退即便朝。損御菲食。寡昧所值。忱懼弗寧。天維顯思。月既晦止。雲氣簇于甲夜。雷雨降其中天。逮翊日之將晡。纔微陽之見象。驗諸食壤。減于算分。此皆上穹輔持。列聖開右。旣惠朕以膏澤之施。復警予以曜靈之虧。俾無怠荒。敢弗抑畏。夫應天以實。感人在誠。期與臣工之良。永思政治之要。用消厥咎。益孚于休。卿均是憂勤。志于將順。煩有稱慶。良增愧尙。

賜宰臣富弼以下上第三表乞加上尊號不允批答

昔孔子達者。辭不稱仁。光武賢君。禁諸言聖。朕每覽前典。莫不嘉此。且帝王之道。安在于彌文。而天人之心。所助者資順。謙乃益之本。損者德之修。矧以眇身。承茲大業。仍以菲德。享諸鴻名。猶懼弗任。居常自惕。幸羣元之隕祉。荷累世之延洪。治無甚虧。時則咸靖。思欲致四海之祭。合七廟之靈。考卜孟冬。躬行大禘。豈曰能事。抑惟舊文。而卿等率籲羣司。推高眇質。將順其美。鋪衍厥章。願鏤寶文。益上徽稱。極大仁之丕冒。昭至化之巍成。美溢而浮。志慚且悸。再嘗批諭。猶執控陳。況乃愛戴所深。形容已至。宅帝皇之大。席神

聖之高固已華出古先。徽兼上睿。若俯徇于誠請。更益施于號榮。既乖本心。恐累台德。

賜宰臣文彥博以下賀老人星出見批答

景霽秋晏。氣分商仲。南極呈于秘象。清臺獻其壽占。卿等道著弼諧。任居毗燮。喜聞吉語。煩有賀章。請以天官之言。屬諸史氏之掌。體誠同于元首。義足表于愛君。載省寅恭。良深嘉尚。

賜宰臣富弼以下賀壽星出見批答

金氣中分。珠躔上見。清臺設候。疇人獻占。述昭爛之乾文。告壽昌之福兆。卿等義存將美。志在祝延。因垂象之薦休。煩刻章之稱慶。寅恭斯在。嘉尚良深。

賜樞密使宋庠等賀壽星出見批答

南極見象。上天垂休。太史獻占。歸福于朕。夫以壽昌之慶。豈敢專饗獨美。當與俊乂大臣。億兆之衆。同均斯祉。永錫難老。卿等欣聞書語。煩有賀章。將順之誠。良增嘉尚。

賜感德軍三軍將吏僧道百姓等詔

朕以允初。德器早成。天屬爲近。適總司于留務。俾節制于中權。進領藩方。留宿京邸。且念賢王之子。用伸敦族之懷。矧茲美原。抑乃名土。按之析瑞。壯厥維城。汝等遙被撫臨。諒多欣懌。今特授允初。依前檢校尚書。右僕射。持節耀州諸軍事。耀州刺史。兼御史大夫。充感德軍節度。耀州管内觀察處置等使。仍加食邑七百戶。食實封三百戶。散官勳封如故。故茲示諭。想宜知悉。夏熟。將士等各得平安。參佐官吏。僧道。耆壽。

百姓等竝存問之遺書指不多及。

賜山南東道三軍將吏僧道百姓等詔

朕以賈昌朝業茂公台器全文武命建牙于南紀仍主籥于北門冠于九侯時惟伯舅屬以首樞缺職前箸咨才召還溫省之嚴入冠本兵之任朝言協比國論倚成緬想吏民久承節制自聞朕命諒愜爾情

賜河陽三城三軍將吏僧道百姓等詔

朕以宋庠文儒之宗台宰惟舊近解樞衡之重俾兼袞鉞之榮言念盟津前經坐鎮命茲書社利以建侯俾寰輔以作藩庶京師而蒙福眷言士吏以及軍民聞孚號之已行諒輿情之胥悅今特授宋庠依前檢校太尉同中書門下平章事使持節孟州諸軍事行孟州刺史充河陽三城節度孟州管內觀察處置河堤等使判鄭州軍州事故茲示諭想宜知悉

賜建雄軍三軍將吏僧道百姓等詔

朕以許懷德少歷戎行老知軍志早持齋鉞久衛寢戎頗積勳勞用加恩數俾侯中冀書社平陽緬想吏民同嘉師帥今特授許懷德檢校司徒使持節晉州諸軍事晉州刺史兼御史大夫依前充殿前都指揮使建雄軍節度晉州管內觀察處置等使加食邑七百戶食實封三百戶功臣散官勳封如故故茲社諭想宜知悉

賜彰武軍三軍將吏僧道百姓等詔



朕以李昭亮、門濟忠猷，世承勳烈，曩澄氛于保塞，命書社于濟陰，升冠內微，倚臨北道，顯庸惟茂，令聞逾昭。進兼宰鉉之名，就司留鑰之務，輔藩惟舊，臺鉞有光，緬想吏民，遙承節制，嘉聞異數，增慰輿情。

賜淮康軍三軍將吏僧道百姓等詔

朕以張茂實、早分將鉞，嘗帥騎兵，參圖前勞，召還舊物，解符書于郢上，進茅瑞于淮西，遙制藩宣，入司宿衛，緬惟有衆，嘉此建侯，今特授張茂實、檢校吏部尚書，使持節蔡州諸軍事，行蔡州刺史，兼御史大夫，充侍衛親軍，馬軍副都指揮使，淮康軍節度使，蔡州管內觀察處置等使，加食邑七百戶，食實封三百戶，功臣散官勳封如故，故茲詔諭，想宜知悉。

賜寧國軍節度使北海王允弼摹勒御書飛白上進詔

省所上表，蒙賜御書飛白二字，謹摹勒上石，上進事，具悉。朕以聽朝之餘，寶茲寸晷，自惟翰墨之尚，猶賢博奕之爲，聊因飛毫，于以結字，式將意眷，且寵親賢，卿有兩獻之風，躬二南之美，喜宣上德，樂盡忠規，忘蟬翼之匪工，煩龜趺之立刻，爰絨墨本，乃剡奏封，深陳感遇之懷，且顯游揚之志，本于信厚，嘉乃恭謙，省覽以還，愧尚無已。

御書賜龍圖閣直學士權知開封府蔡襄摹寫賜御書刻石事敕書

省所奏，伏蒙特賜御書，臣齋戒摹寫，刊著于石，次錄獎詔及臣所獻古詩，兼載後序，以紀遭遇，裝一軸上進事，具悉。卿體行清方，才謨詳正，通于學術，粹是風業，朕選諸近侍，佳有名臣，因暇日以援毫，命中璫而

賜字蓋以將朕異體成卿令名退思匪工追用自惡而乃深于感遇篤在游揚形頌歎之長言溢尙〔案〕  
集·有御書碑序·其載勒石事進始末·在至和元年六月二十四日·其結銜稱起居舍人知制誥·與此不同者·攷襄本傳·自起居舍人·遷龍圖閣直學士·知開封府·蓋其勒石作序·在爲起居舍人時·而賜敕則已在轉官後也·襄集不載敕書·此下闕文無考·

賜右神武大將軍陸州團練使宗諤進太平盤維錄敕書

敕宗諤省大宗正司奏汝纂歷代宗屬事蹟勒成上下二帙總六卷分一十二門仍請名曰太平盤維錄上進事汝迪德自先蒙廕于後能外紛華之習頗勤教學之方聞釋舊聞尋研本系類成編次實有綱條撮諸胄緒之華光我神明之祚奏篇來上乙牘以觀有嘉規爲良深歎尙

賜宗室磁州防禦使承亮進給享受釐頌敕書

敕承亮省大宗正司奏繼汝表今撰給享受釐頌并序投進事朕曩者法一閩之氣講三歲之祀孟冬吉酉給于祖廟陳歷代之寶奏大安之樂神靈嘉饗雲景杳冥朱燎旣升正陽顯見豈予能感抑祖宗右焉汝肅雍侍祠將順爲志中有和樂發于頌歎大宗獻狀奏篇登御流藻以揚主依義而顯君省覽之餘歎尙兼至

賜翰林侍讀學士知徐州呂公綽進明禋詩敕書

朕曩以祗飭齋輅肅奉陽郊合祛乾祗登侑祖考秩上下之祀則靡神不宗致精微之產而惟帝時享錫朕休福惠茲羣黎夫豈寡德之能實繫先烈之茂卿職參經幄任總藩符志在游揚形于頌歎思致婉錯

典裁淳深。省覽不忘。嘉尙兼至。

賜知濟州李及之進唐雅敕書

省上表所撰唐雅十篇。謹繕寫附遞上進事。具悉。汝職居延閣。符守列城。宜詔條而弗苛。服文史以爲樂。研尋前載。追述雅風。文采深純。典裁詳密。奏篇來上。留牘于中。省覽之餘。不忘嘉尙。

賜交趾李日尊進異獸敕書

卿仍世守藩。乃心向國。越滄波而述職。奉異獸以致誠。在遠彌忠。願勤可紀。式將頒賚。爰寵傾輸。當體眷懷。益思恪順。

賜宗室叔哀進異獸歌敕書

近者。交州遣使。以麟底貢。私怪物色之異。且驗載籍之傳。通儒碩生。多云非是。朕方懷柔彼俗。重遠其情。與見于庭。命納諸囿。汝以宗藩之秀。時豫觀者。喜毛羣之馴優。美島夷之稽服。昭我德政。形于頌聲。副以編聯。乙于省覽。游揚兼在。喜尙弗忘。

